

誠意伯劉文成公文集

七



太師誠意伯劉文成公集卷之十二

卷之十二

後學麗水何鏗編校

四言古詩

有泉在山一首

有泉在山爰注為壑膏火自煎一室之燭蔚彼茂林有檀有
松有梓有桐可以為車可以為宮 有泉在山爰注為澗膏
火之燭維以自煎蔚彼茂林有柞有栲有檇有櫟可以為薪
可以為杙

東園之柳一首

東園之柳萋萋黃矣瞻彼白日煥其陽矣睠睠懷思曷其長

矣 東園之柳萋其青矣瞻彼白日煥其明矣睠睠懷思曷
其平矣 東園之柳冉冉其華悠悠行人玄髮卒華瞻彼白
日維懷求嗟 黃鸞于飛喈喈其音惇惇行人悠悠其心瞻
彼白日維懷求吟

維澤有蒲一首

維澤有蒲為陳生思禮作也陳生生七歲而父沒母石氏
教育之甫成人而母又沒生哀痛不能勝輒發狂欲自盡
者四五家人守救之獲免翰林學士金華宋先生為叙其
事予聞而深悼焉因賦詩代言其情雖不足以附蓼莪之
後亦聊以見天理之在人心昭昭乎不泯也嗚呼悲夫

維澤有蒲其葉濡濡誰無父母恫我獨孤旻天不矜鮮民卒
痛我罪實訐父母何辜 人有父母如日如月煦之照之弗
隕弗越人有父母如玄如黃覆之載之不遐有傷 陟彼崇
丘言采其葛望父不見憂心如割陟彼重阜于以望母不見
母兮憂心如炙 相彼虎雌亦各有從矧伊人矣惟此鞠凶
帝彼中林爰有嘯鳥恫我人斯云何其瘖 父兮見兒孩咲
咿咿晨興未炊早念其飢母兮見兒孩咲歡歡草蟲宵鳴早
念其寒 既髻既髻綵衣有茨父攜母將如琬如琰出則睹
之入則撫之行有隍扞式趨負之 中園有橘離離其實人
無父母曷其有卒中園有梨其實離離人無父母生也何為

川水東流蒼天悠悠恫我鮮民不知其尤空山冥冥離禽
夜鳴恫我鮮民曷為其生

雞鳴一首贈宗文姪

雞鳴朝暉草露未晞巢鳥于飛 雞鳴夕陰草露淋漓鳥歸
于林 雞鳴匪司時鳥舉匪有期氓之蚩蚩蓋亦何思 朝
露白如玉我不敢躅恐濕我足夕露光如珠我不敢踰恐濕
我裾 誰謂河弗廣可航可蕩風波無期不如勿往 誰謂
林弗幽可遨可游豺虎無虞不如勿由 中田有禾園有樹
麻發石有泉可以為家 中田有麥園有樹核采山有蔬可
以為宅

送季德大之文登稅務官任

有客有客駕言遠行天路脩廣鴻鴈冥冥淒風吹衣白日滿
庭有酒在樽可以怡情云胡不飲使我心悻歌以侑之百祿
具并

芄芄者麥在彼原隰悠悠行人既舟既楫海邦孔遐雲霧蔽
浥勿謂政難克敬則立勿謂俗殊克誠則輯贈言不多聖企
斯及

有栢一章為吳太常作

太常從善七世祖諱安國宣和中以少卿使金被拘七年不屈節見宋史

有栢有栢霜露灌之栢葉不萎霜露何其有栢有栢維葉

冥冥歲暮堅冰不渝其貞莽彼北林維榛維棘玄雲四湧白

日晝匿 有狼有狐有鷓有烏長疑睢盱湮腦飯膚 有颺
其風齧捷于溟五精相礮江河倒行 蛭矯于雲龍羸于沙
哀此下民亦孔之嗟 赤董之金鑄為干將不荆犀兕孰知
其良 沙棠之舟泛于廣津不暹陽侯孰知其神 跋彼周
行君子蹟之猗彼葦竹君子植之顯允君子邦家之紀克崇
厥履施于孫子 巖巖君子穆穆其猶載其令德貽厥孫謀

黃華一首送葉師仁省兄還栝蒼

睨彼黃花有燁其輝驪駒在路送子于歸 蔚彼柔桑猗其
條矣心之怊矣維其遼矣 翩翩者鷗亦習其羽悠悠者途
孔脩且阻 執子之手酌子以酒言念言懷勞心如糾 子

有兄弟維曾維臆嗟我之懷曷云能極瞻彼崇阿維雲茫茫
之子之往多我慨傷鴻鴈于征載號載飛兄弟之遠胡寧不
悲 山川遐邈日月逾邁送子于歸俾我心瘳

春夜一首

春夜迢迢微風不興六合無氛銀河欲冰月流素波星回玉
繩孤坐不寐憂思相仍壯年已謝昔非莫懲如彼老馬心念
超騰道路崎嶇勤不可能俯撥紅爐仰剔青燈欲與晤語誰
其我應

青陽一首

青陽俶載白日孔昭草生于野華發于條隨氣成形或藥或

翹睠睠興懷中心飄搖麥有雉雒藻有魚跳嚶鳴在樹磬管
簫韶駕言出游以猶以陶暉不可髣髴不可夭自非松柏不
能後彫來者弗畏往者其消

春日一首送吳浩叔大之饒州府通判任

春日載陽鳥鳴干乘與子為別思心洋洋 人生幾何憂念
苦多仰睇浮雲俯觀逝波 有斂在籩有酒在觴無日不腆
物鮮意長 翺翺者鸚飛鳴戾天企賢則善企聖斯賢 古
人有言立事惟勤克敬勿懈何適不臻古人有言顧畏民暑
綫溜摧山患生不監 駕彼四牡言陟太行羊腸不憤做在
康莊 感以情生憂由愛甚有酒在尊云胡不飲 春日熙

熙芳草菲菲與子為別胡寧不悲
歡喜耳是謂疾疾君子
虞之如矢如刃 忠言諤諤是謂藥石君子好之如金如璧
相彼川水孔淵其澄風以撓之黃濁山騰 有蘭有蘭在
彼幽畎無日不顯其芳維遠 春日遲遲鳥鳴啾啾與子為
別胡寧不懷

條風一首

正月載陽二月條風纈彼郊原載青載紅維麥萋萋維桑
芄倉庚戾止有皖其容 二月條風吹彼平林翹翹維英如
盞如綬維麥離離維桑陰陰倉庚戾止啾啾其音 三月鳴
鳩爰拂其羽玄鳥于翔載庭載宇有漂者萍亦被于渚睠睠

懷人繁念斯聚 維淵有魚悠悠其逝維隰有蒿其葉泠泠
睠睠懷人心焉如察瞻言則惟倦言則睟 維麥離離宜其
食矣惟桑陰陰將其穢矣翺彼鷓鴣如坐如簧澤雉于雒繡
衣錦章 殷殷其雷霏霏其雨睠睠懷人曷其有與霏霏其
兩殷殷其雷于以求言于以寫懷

題蘭雀圖

有雀有雀亦集于棘無啄我蘭空林多風霜露其溥婉彼孤
芳克貞以完無俾荒蕪以永歲寒有雀有雀亦集于枳無啄
我蕪空林多風雨雪有曠婉彼孤芳克貞弗替無俾荒蕪以
永終歲

秋懷八首

涼夜悠悠華燈有輝
淒風動林明月在帷
山川迢迢游子無
衣瞻彼原隰零露漙漙
靡草不凋無木不稀
不覩逝波焉知
昨非亭亭南山有蕨
有薇黃華晚祭紫芝
秋肥歲云莫矣胡
寧不歸 陟彼高原望
羨中陵玄商夕振白
露宵零蔚彼茂草
化爲枯莛我有素琴
玉軫朱繩彈爲陽春
旭日滿庭愴懷興
懷悲來填膺子期逝
矣其誰汝聽

嚶嚶草蟲慄慄其股
歲莫如何爾獨良苦
瞻望日月綿綿我
愁如彼逝矢一往不
留嗟爾小子時不再
得匪繆曷魚不藝
胡稷蕭蕭草蟲烈烈
其音歲莫何爲祇覺
我心

中庭有棗蟲蠹其其實零露既降歲事孔疾循彼階軒有鳴蟋
蟀豈其膚發而不栗烈南山峯嶽松柏蕭瑟彼蘭斯猶彼枳
斯摘安得羽翼載飛載鳴汜濫八荒以終末日

有燭者螢載飛載揚有倬雲漢載炳其章白日易徂玄夜何
長繁思交橫浮念無方慨懷古人中心怛傷離婁宜行歷坎
而僵循墻以趨雖瞽不俟猛盾雷咆班文在床妖狐鬼潛毳
裘黃黃悠悠多岐蕩蕩周行慎爾馳驅天命有常

夕簾既清餅水既寒浩歌臨風憂來多端懸崖而樓瞽以為
安菅茅在門蒙以為蘭黍稷弗膳腐鮑是餐干將掛壁救履
加冠究其悲矣能不末歎

鬱彼晨煙亦曼于楚瑟彼枯楊策策其語良辰幾何亦既徂
暑溽彼郊原有禾有黍凄風夕興鴈鷺如雨

今日何日歲聿其秋候鴈北來星火西流懷我故鄉道阻且
脩俯察淵潛仰睇天游孰期匪鳶孰躍匪虬瞻望日月中心
如抽豈無美酒焉得良儔矢詩不多聊以解憂

山有喬木一首贈王子章

山有喬木有條有柯人無兄弟云如之何寤寐懷思憂心實
多翩翩者鴻行彼幽草人有兄弟如城如堡寤寐懷思戰兢
以保惟彼兄弟一本而枝同氣殊心則各有思造次弗念參
商以離莫矜匪父莫哀匪母豈羔之先孰斿之後憂飢悼疾

中心如灸維此哲人秉心不回夙夜寢興二人是懷如彼駢
蚤死生以借維彼愚人弗念厥紹利火中焚諛兵外挑且羹
不平干戈是擣温温恭人如炯如絲宮鳴角應羽振商隨翕
翕雍雍融融怡怡我尊既陳我俎有踐言念兄弟中心弗殄
敬慎威儀以謹嫵婉有鳥有鳥喈喈其音拂彼叢薄揚于中
林宜爾子孫式昭厥心

有鳥一首贈袁尚志

有鳥有鳥薄言繳之君子至止何以樂之有酒滑滑亦盈于
觴明月照帷清風滿堂我酒既旨我儀有秩言念君子温如
其日有鳥有鳥載好其音君子之洽如瑟如琴有斐有斐有

勸有飭古訓是式大猷是力有栗者瑩瑕則磨之有紆者絲
色以訛之如彼織紵君子維經如彼鋒刃君子為礪無為夸
毗無為戚施伊我之僨亦子之殘此令朋友交相為助匪中
式孚俾好作惡有酒在觴有琴在堂酌言鼓之心焉孔臧有
鳥有鳥載翔載飛豈弟君子式昭令儀業不厭脩學不厭多
既酌以酒復相以歌

擢彼喬松一首

擢彼喬松在彼丘阿歲莫淒風飄為枯柯憂來傷心云如之
何瞻彼昊天曷其有宜天降淫德痛于下國稻粱黍稷暨于
螟蟻不稼不穡寇攘以食哀此下民曷其有極心之憂矣如

烹如煎喪亂靡底如淵如泉如彼與草孔蔓以延嗚呼昊天
伊誰之愆有爵者量曷施于宇胡曷于林覲彼魴鱖小人所
無君子所與弗詢弗猶曷其有愈君子不畏亂日以熾君子
不憂亂日以悠正言諤諤言諾諾歡言孔怡喪亂所基邦
家維車庶民維輿庶僚維服大臣維御慎爾驅馳俾險作夷
無然汶汶無俾車僨無曰予知民各有思無曰予聖庶民孔
競無競維德四方之則無為回適以縱枉慝瞻彼高原翳翳
其雲眇彼大水浩矣無津噉噉飛厲各念爾群哀我人斯胡
胥以淪莫高匪天莫明匪日何纖勿冒何昧勿晰維此聖人
庶民是葵維彼愚人則各有謀原隰之瘁夫婦云之間巷之

呻君子聞之弗聞弗惟則各有思式謗式詈腑腸以離穀斯
之秕農以為殃匪鷹匪隼曷云能翔維天有船不可以航
言顧之心焉惻傷相彼茂草飛鳥依之淠彼深淵魴鯉歸之
靡依靡歸胡能勿悲我有隱憂人莫之知中途有棘庶民伐
之執訊弗篤君子聖之不曠不聾孰填爾聰靡瞻靡顧自貽
伊瞽如彼沸鼎無增爾薪無從爾言以逃遠人邇人營營遠
人兢兢弗訛爾心曷其有懲嗟爾君子戒慎爾止靡謙不光
靡盈不毀維山有杞維澤有芷庶民所履維君子使陟彼高
原維風颯颯靡草不凋無木不刘憂來傷心如焚如抽瞻仰
昊天曷其有瘳

五言古詩

感懷三十一首

閑夜坐中庭逍遙散煩襟素月出高雲清風來遠林仰觀河漢流俯聆鶡鴠吟佇立起長歌感歎一何深

驅車出門去四顧不見人迴風卷落葉颯颯帶沙塵平原曠千里莽莽盡荆榛繁華能幾何憔悴及茲辰所以芳桂枝不爭桃李春雲林耿幽獨霜雪空相親

誰云魯酒薄邠邠被戈矛楚館困兩君乃為馬與裘舉世共如此太息復何尤振衣箕山頂引領望許由終然不可見涕淚交膺流

古人盜天地利源不可窮今人盜農夫歲莫山澤空紛紛九
衢內連袖如長虹共咲沮溺鄙各事游冶雄悠悠方自此袞
袞何時終

啾啾草間雀日隨黃鳥飛爭先赴稻梁寧顧野人機便便善
柔子懷利近相依但慕春莢好不見秋霜霏驅車逐走鹿中
路忘所歸豈不愛其躬天命與心違古道今已矣感寤空涕
歎

柔柔生中園婀娜當陽春下滋靈泉液上承膏露津美人望
蠶月傾筐競明晨榮盛方及時采捋一何頻枯根不盈拱何
以禦霜辰復聞芻蕘子磨礪待為薪冥觀成感激躑躅含酸

辛

無恤得尹鐸晉陽以為歸馮諷勸市義孟嘗能不危戰國有
如此况乃商周時漢武任棄羊腴剥盡膏脂向非輪臺詔持
斧空繡衣悠悠復何道咄咄令人悲

伏枕候明發夢遊滄海中中有萬斛船蕩漾隨天風舵師兀
昏睡環視立衆工波濤正洶湧欲往迷西東寤寐惕驚起魂
魄猶忡忡

蘇秦佩六印賓從何縱橫當時機中婦倩咲遠相迎黃金生
意氣蠶蠋見人情豈無簞瓢士今為時所輕

種樹當中庭不識美與惡微陰未盈戶枝葉猶荏弱一朝根

抵成延蔓蔽樓閣離披引刺蚝蒙昧喧鳥雀毀垣施斧斤得
喪亦相若萬事不早謀日暮徒駭愕

東園多桃李擢榦何交加春秋互通代衰榮競相夸槭槭去
故物英英發新花花謝葉復作空令人歎嗟

翡翠翔江湖亡身為毛羽不如道傍李尚得滋味苦驅車上
太行還顧望梁甫高岡多烈風茂林化為岵空餘澗底藤蒙
龍蔓煙雨

浮萍不依山女蘿不移根草木非有心天道更何言如何三
春子磬折隨涼溫朝乘晉主車暮集韓魏門巧咲發容輝馳
騁矜愚昏誰見陶彭澤黍麻滿田園

上山采幽蘭盡日未盈手持贈故交人長喚不回首蘭花豈
不芬故情豈不厚投之非所好良意翻成醜

峩峩蓬萊山渺渺大瀛水神仙有窟宅亦在玄黃裏大壑多
驚風不辨龍與鯉吹沙乘波出洶若鯨鯢起陽侯貫深淵海
若汨泥滓馬銜恣饑食罔象潛譎詭誰能報王母弱水不可
履羲和近虞淵日暮空已矣

亭亭山上木蔚蔚石底竹諒非懷隱憂胡為自局促振衣陟
崇岡高下睨原陸鳳凰棲枯枝稻梁肥鴈鴛春陽悅衆目風
雨愁比屋人主各有情豈若麋與鹿

射干生魯崖不識寒澗陰池魚貫安流寧知江海深殷王相

版築垂名耀來今後世重閔閔田野多呻吟

鰕魚湧姑射月暈滄海風鯨鯢吐高浪白日寒瞳隴神仙下
天闕左右翳玉虹金盤薦麟脯翠蕤擁青童酣歌殷溟徼魚
鼈相噉喙忽然乘雲去寥落寒江空

朝登會稽山逍遙望南訛禹穴已蕪沒禹功長不磨惆悵感往
昔沉吟發新歌誰言專車骨冠弁高嵯峨為虺且復爾為蛇
當奈何天門隔虎豹空悲涕滂沱

結髮事遠遊逍遙觀四方天地一何闊山川杳茫茫衆鳥各
自飛喬木空蒼涼登高見萬里懷古使心傷佇立望浮雲安
得凌風翔

芳樹生丹崖綠葉如雲烟上枝蔽光景下根蟠九泉朝涼聒
衆鳥夕陰萃鳴蟬豈不盛容色及此陽春年西風吹白露點
綴庭堦前繁華坐銷歇枝葉空相捐世情多反覆天道有推
遷金屋擅嬌寵長門閉神仙獻賦亦已晚徒悲淚如泉

我有綠綺琴其材出空桑金徽映玉軫音韻鏘琳琅上絃感
薰風下弦來鳳皇世耳不欲聞子期今則亡願持獻重華路
阻川無梁

孟軻去齊魏賈誼之長沙聖賢良已矣吾道空咨嗟徒言青
松枝不如桃李花太息安陵子知時為世誇

客有持六經翩翩西入秦衣冠獨異狀談舌空輪囷獻納竟

何補焚坑禍誰因昂昂採芝士矯矯蹈海人龍驤九淵外豈
復嘆獲麟

白壁悶頑礪淪晦同泥沙朽壤生夜光見者咸驚嗟君子分
寂寞小人互矜誇枯瘁若秋蓬鮮豔如春華狂風忽簸蕩飄
落歸誰家

大道散草澤呻吟在康衢蔓葛自纏繞蘭蕙日蕭疎雞鳴出
門去薄暮還走趨進則蚊蟻萃退為失群鳥君看拜塵友逸
氣凌東都淒涼白首歎千載為嗟吁

象以齒自伐馬以能受羈猛虎恃強力而不衛其皮世人任
巧智天道善盈虧不見瑤臺死未為天下嗤

槁葉寒撼撼羅帳秋風生淒淒候蟲鳴啾啾賓鴻驚羨人抱
瑤瑟仰視河漢明絲桐豈殊音古調非今聲沉思空幽寂歲
月已徂征

晨登吳山上四望長嘆嗟借問胡嘆嗟狹路險且邪子胥竭
忠諫抉目為夫差宰嚭善逢迎越刃復相加守正累則多從
人禍亦奢遭逢貴明良不爾俱泥沙

壺公下天闕聊以觀世紛賣藥汝南市時人俱不聞顧此非
我徒飄然乘白雲方駕雙虬龍被服九霞文但見北邙阪岩
堯盡高墳

種苗甫田中其葉何離離上天降膏澤溥博無偏私人力苟

不至不如茅與茨常恐嘉實晚坐傷零露滋徘徊感節序太
息秋風時

詠史二十一首

凱風扇朱夏草木生清涼卧疾澹幽曠白日悠且長散帙觀
古人喟焉想虞唐陽春能幾何陰氣多繁霜天道諒悠悠人
理亦茫茫詠歌寄深情歌罷增慨慷

神樞幹元化循環運陰陽善惡隨氣異禍福竟何常朱均繼
堯舜時事已搶攘至人妙轉移霾暄回晶光祥麟暗大野君
子徒慨慷黃星照中原天道遂披猖汗漫千百年流潦浩滂
滂否泰有傾覆霖雨見朝陽惜無風雨收乘時佐羲皇熙熙

返大樸濟濟垂衣裳鼎湖去不復歎息空哀傷

野馬不羣食彊受組與羈低頭衡軓下各自東西馳秦人任
法令斬艾尊君師六合始一家恩愛已乖離一旦山東客揭
竿以為旗叫呼驪山徒天下響應之素車拜軹道誰復為嗟
咨

周昌勇庭諍子房善竒謀王陵抗高議平勃終安劉經權兩
不廢道立知亦周煌煌東都士節義明清秋孰知讒佞巧舉
足觸戈矛顧此悲世運泫然涕交流

食毒偶不死謂言董可餐墮河偶不溺謂是天所完侈心不
自顧利欲紛多端百勝困一躓名滅軀體殘君子戒微幸小

人樂災患不見理與羽千載遺悲酸

燕昭志報復金臺求俊賢下齊如破竹大耻雪九泉六王死
灰人安可與比肩奈何驕氣盈妄想彼神仙安期不可致即
墨火已然煌煌召公業委棄如浮煙

天狗吠梁野七雄扇妖氛吳徒二十萬剽若狼虎群鼓行破
棘壁長驅似輕雲漢將三十六朱旗耀天垠救梁不奉詔太
尉真將軍遂令千載下知人稱孝文哀哉潼關戰百萬徒紛

紜

平居觀群物紛紛爭朶頤口舌不能勝兵戈遂相隨古來豪
傑士于今安所之大運一朝至孰分賢與蚩所以四老人去

采商山芝清風扇六合百世真吾師

景公逐雀鷁晏子稱其仁鰥寡既有室長年不負薪焉知子
王節遺禍速天倫推恩限目見太息此君臣

田橫不事漢勿頸送咸陽二客既穿冢島中皆自成雖非中
庸道要亦有耿光英雄久淪沒世俗但炎涼嗟嗟翟廷尉慷
慨令人傷

吾聞共工臺乃在崑崙北長蛇戴九頭利吻錯戈戟呿呀恣
啖食抵厥成溪澤嗚呼三仞沮可以警貪貪得

四七續炎運漸臺殪狂新建俛首褒德拳拳念生民富春有
遺老終竟不為臣遂令節義士視身若埃塵前車屢折軸後

駕無迴輪不有錮黨禁何由起黃巾為邦貴知本明主宜書
紳

建光悖祖德封爵逮闕豎忠良坐荼毒隕涕盈道路南巡既
不返狡窟寧久固功成十九侯事已非細故况聞用骨鯁乃
以浮陽疏中官既世襲山陽更媯姤時事亦可知君子獨未寤
美哉吳長史衡門掩秋露

當途亂天紀赤帝懸空名寧知辟椽日禍機已潛萌晉主念
私勞荀馮巧相迎撫床竟不寤骨肉成鯁鯨好還實天道狙
詐徒人情

香餌獲死魚重賞致死士自古以為訓世俗寧知此陳湯困

刀筆壯夫皆切齒如何中興主終竟惑蒼生

隋帝易廣勇天命以不長唐宗昧治恪本支竟摧戕聖人有
達節變通亦何常禹湯不同跡萬古皆明王

末嘉昔漬亂南渡馳五馬長江畫天塹九廟扇灰地豈無運
甕人亦有誓江者胥池不揚波靈物棲曠野哀哀黍離淚空
向新亭灑

華門翳蓬蒿窮巷絕馬跡中有抱膝人疏糲不充食榮華過
浮埃敝服無愠色獻玉鄙卞和扣角羞甯戚天潢不垂雲中
夜起歎息

吾愛閔仲叔幽居翳茹茨應辟思濟世利祿豈其私進當致

堯舜退則老蒿藜馬能犬馬豢以為天下嗤

美人皎如玉挾瑟升高堂泠泠向長風操作孤鳳凰曲度未
終竟玄雲蔽穹蒼走獸駭赴林飛鳥號且翔高山與流水日
莫空淒涼

夫差卧薪日勾踐嘗膽時人生各有志况乃身踐之寧知姑
蘇鹿已與西施期空令千載下痛恨於鷓夷

游仙九首

日月如過翼瞬息春已秋何不學神仙縹緲凌虛游雷霆以
為輿虹蜺以為輶清晨登閭風薄暮宿不周長嘯層城顛濯
足翠水流俯視八極內擾擾飛蜉蝣

今日何不樂振策登高山深林仰無見藤蔓陰以繁黠黠繞
樹啼黃鵠空飛翻攬轡向西北思欲赴崑崙瓊樓十二重豹
虎夾陛閣青鳥去何之誰向王母言徘徊歲華晚感激生愁
怨

岐陽隱孤鳳寰海騰蛟蛇不食松栢實而采日及花翩翩柱
下史望望之流沙麻姑何為者乃降蔡經家神龍集沔澤取
笑於魚蝦

費生市井兒未嘗識神仙偶然壺中去謂是別有天幻化且
不鮮真訣安能傳那將食色身妄弄刑賞權果然失符後衆
鬼不見憐

天高河漢清露白秋宵永朝華炫紅芳螭蛄弔馳景繁息靡
志帥內疚積心梗涉江無方舟汲井悲短綆歲莫霜雪寒泣
涕沾項領

秦皇煽霄燄烈烈燔九州平原曠如赭鴻鵠安所投所以避
世士慨想乘桴浮樓船載侘子去作汗漫游何必蓬萊山遠
人即瀛洲虎視徒逐逐竟死於沙丘

娟娟姮娥女灼灼芙蓉姿一入月宮去千秋閉蛾眉涼風清
玉除碧雲生桂枝鳳歌不可聽長夜有餘悲

晨登女床山西北望崑崙樓臺似霄漢金碧氣魂魂素女三
千人灼若扶桑暎鸞笙引鳳舞雲旆隨霓旛老童發清歌昌

容戲紫鸚神荼獻丹桃洪崖開玉尊蜚廉漫崔嵬建章空千
門

大道久已晦誰能識仙真如何賣藥翁恠語驚市人日月空
明照朝菌非大椿已矣復何道去去生愁辛

感寓六首

暑退生夕涼褰衣步微月風來竹陰動草暗螢光發佇立忽
懷人江河渺難越

庭前金鳳花向晚爭媚嫵但見白露滋豈知繁霜苦芳時良
可惜此物何足數

白露下木葉淒涼江海秋江臯有鳴鴈噉噉安所求稻梁日

蕭索風雨徒離憂

一日復一夕一夕復一朝青燧向暗壁光燄坐自消
六翮絕意於雲霄

嚴霜墮與草蛇虺去所依可惜蕙蘭花與之共頽菱顧此悲
世運泫然涕交頤

淒淒素秋霜苒苒高原草運窮相值遇黜顏就枯槁浩歎采
薇歌慚愧商山老

招隱五首

浮景無根株逝川不可留昨日瑤草春今朝蓬梗秋鼎食豈
不美醜毒潛戈矛華軒豈不貴長路能摧輶子胥棄吳江屈

原赴湘流韓彭竟殖醢蕭樊亦累囚何如張子房脫屣萬戶
侯深韜黃石畧去從赤松游

秦皇火六籍黃綺之商山漢帝握乾符羊裘竟不還古來遯
世士冥心丘壑間於時苟無用安事空摧顏石泉清以芳白
雲寒更閑春蔬雜甘辛秋果羅青殷濁酒晚自酌柴扉晝恒
閑嘯歌陟崇岡濯足臨潺湲金馬我何榮羊腸我何艱鴻鵠
翔九霄邈然不可攀

豫章長千仞挺生崇崖陰布葉連青雲交柯蔽層岑結根豈
不固斤斧將見尋有栢生石間屈曲叢灌林古根齧飛溜電
火焚中心大不中梁柱小不堪瑟瑟風霜自搖落偃蹇獨至

今

流水千百折白雲三四峯上有噴壑泉下有凌霜松中有一
老人坐嘯巖間風素髮垂兩肩朱顏映青瞳年紀將百齡容
貌如孩童長跪前致辭子非列仙翁咲謂汝孺子語汝使心
通我生不偶俗遺身在蒿蓬結廬白水邊采藥青林中世語
我不接世士我不逢簞瓢我不憂軒蓋我不崇自耕足我食
自息安我躬冥冥絕思慮默默全和冲持此攝吾生仰荷元
化功何必插羽翰遠逐浮丘公再拜受斯言廓然如發蒙投
簪謝知己一去無回蹤

有客款我廬身披紫雲袍鳴騶列前後從者皆俊髦坐我蓬

華下向我談伊臯手幹北斗魁足踏東海鼇高視六合內秦
山等毫毛揮袂起謝客且還飲我醪醉卧不知曉衡門塞蓬
蒿

雜詩四十一首

江籬生汀洲香氣何清婉欲采寄所思不憚道路遠疾風吹
塵沙山澤蛟蛇混誰復惜芳菲空悲歲年晚

小魚頭如針大魚須如松小大各生育孰私天地功坤靈發
淫怒溟海簸驚風大魚食小魚陂池為之空陂空水亦竭小
大相噏喙但見灌莽間顛骨成崆嶲殘膏餼螻蟻孰辨鯨與

鰕

僂婦厭貧夫常懷相棄心慨慕東家子年少多黃金輕身改
西託布被爛錦衾寧憶秋風起霜露淒繁林葉落枝亦盡愁
聞蜻蛉吟

雲月雖不明精魄固長在飛蛾亦何知乘時妬光彩天高多
飄風烟霧中變黷紛紛隨蒿棘終竟為何罪

人生如浮雲飄搖無根蒂昨暮青山阿今朝滄海濛風波無
定時淪躓難為計是中苟不爽曷問耿與騫申胥存楚國仲
連却秦帝此士雖則亡英名千萬世

渴人常夢飲飢人常夢餐中霄羈旅夢兩臂生羽翰騰身入
紫青吹面天風寒驚覺凜毛髮感我涕洟瀾

吾觀神龍變天地為晦冥龍成宰元化嘉澤浹四溟出山不
飄風入水無震霆枯萎仰沾溉沃若生葱青豈比蚘與螾裂
石摧嚙陞俾民舉疾首抗神蹙眉顛

鷹本是鷲鳥瓜利翮勁疾胡為化為鳩鈍拙無與匹棲遲荆
棘間粒啄營口實暮啼墻角雨朝啼屋頭日昔為衆鳥畏今
為衆鳥啞運命苦不常孰為金石質

愚公志移山精衛思填海山高海茫茫心事金石在松栢
雪霜秀色終不改春陽熙幽林卓立有光彩

急雨漲潢潦溝池成五湖青蛙與耿黽得意鳴相呼自謂樂
無似至足不求餘蓬萊有玄鶴曾見東海枯清夜蜈蚣長風哀

音繞天衢使我起太息黑髯變霜鬚

空庭生夕陰高閣留返照歸鴉集紛紛棲雀鳴嗷嗷冥思觀
群物肆目展遐眺草樹蔚參差雲霞相輝耀慷慨商山心想
像蘇門嘯大鵬搏扶搖斥鷃駢蓬蒿悠悠共淪汨潰潰堪一
笑

惟豺知祭獸獺亦知祭魚豺獺有報本人道當何如華堂飢
玉食盜賊塞中塗那能不自媿而以耀庸愚吁嗟千載下枯
骨空專車

雷藏蟄蟲伏雷動蟄蟲起蟲雷不相期冥契非人使英雄應
有時何異羶致蟻神劍無風胡銅花蝕泥滓

種荷綠池中荷生葉猶紫掠萍逐蛙蝸恐畏傷荷蓋荷心有
露珠的皦無泥滓荷根有藕絲纏綿誰得似

陰崖有喬樹乾鵲巢其顛朝食葉上露暮食葉下蟬巢成長
衆雛鳴飛一何嫫但願本根固風雨得安眠如何就搖落而
不抱悄悄

蒼蠅眼晝明蚊蟲眼夜明明眼利口嘴晝夜無時停拍死紛
籍籍飛來更營營一旦霜風起稜威肅天刑飛者不復飛鳴
者不復鳴雖有太陽光不能煦其生乃知天勝人智力徒鬪
爭

豺狼食人肉蚊蟲食人血食肉死須臾食血死不輟哀哀露

筋女肉盡惟皮骨誰謂蚊蟲微積鏽能銷鐵

蟲母羽蟲孽與人無怨尤胡為含毒害吐蚊吼如牛紛紛散
草澤解解森戈矛無辜受螫蠱皮破腥血流覆巢或有令未
應後鶴鷗

黃鷹食鳥雀山雞食蟲豸蜂食花上蜜蝦食苔間滓兔食茅
草根鳳食梧桐子所嗜由性成易之則皆死冥觀付一咲誰
與窮茲理

魯陽仰揮戈羲和為紆轡耿恭俯拜井湧液出荒地精誠所
感格高厚靡不至人生亦良難如何殄其類蓬蒿滿六合慚
愧真宰意

在昔信陵君謙勞實弘度好士天下稀賓客遠傾慕救趙奪
兵符掃清邺鄆霧歸來存大梁秦甲龍臺顧魏王木偶人朽
心自成蠹讒言一以入危石不可據日落西河陰歌鍾怨零
露

天鷓巢蒿草形軀纖且微不知懷何事直上聞天扉啾啾終
日鳴天聽不可希鍛羽口吻裂落日空悲啼

雉死為從雌鶻死為鬪力蜜蜂死洩憤鳩鳩死求食象犀好
齒角狨豹羨毛色紛紛死相藉殺身奉華飾自取夫豈過外
至良可惻樞鏡合族烹梟鷓宜卵殪山林久穢薈誰復繼禹

益

天風觸萬竅，小大皆有聲。律呂與懸匏，嘈嘈同一鳴。人情有所鍾，聲氣為之使。無知而強聒，則亦懸匏耳。

殊俗甘胸臆，比之芻牛腴。殷勤奉賓客，自謂敬有餘。鷓鴣雖異貫，赤惑誰能祛。霾陰蔽玄象，清渭混汙渠。誰能繼夏后，再分龍與魚。

大星出西方，睽睽如明月。兒童驚指示，草木見毫髮。夜久斗柄迴，人靜涼風發。徙倚步中庭，空烟散成雪。

楚人將適蜀，揚帆信江水。江闊多西風，帆逸行不止。日暮入海濤，極目無涯涘。鯨魚吹高浪，舵折檣竿圯。頭足空號呼，烟波千萬里。

冲霄難為羽泛海難為舟縛羊駕戎輅猛志空悠悠農時失
耕耨何以望有秋决藩盜菽粟鷹隼不如鳩韶華不我與去
若川水流歲莫獨彷徨凜凜懷百憂

爰居避風翔豈糞築牲祀滅孫強自用取咲於君子拾蟲養
鳳凰將以為觀羨徒令羣翟畏長逝深林裏

神仙不世出螭蛄咲蜉蝣嘉禾曠膏澤稊稗矜有秋驅馬將
焉徃荆棘滿崇丘玄陰結嚴冬芳意坐自道鴻鵠從何來哀
鳴聲啾啾願欲適縣圃路阻迷所投况我孱懦成引領空憂
愁

桓温一老兵豈識捫蝨士擁衆臨上流竟作跋扈鬼符堅氏

羗豎何能作天子，耽耽視中原。為有景略耳，知人聖難之求。
賢在虛已袁曹，豈力敵生死。一彈指惆悵，後來人慷慨前車。
軌

英英木槿花，振振蜉蝣羽。乘彼三秋露，及此六月雨。容好能
幾時，生成亦良苦。十年構阿房，一日化為土。染鬢作童顏，於
身竟何補。不如順天命，保已良多祐。

天地若大甕，萬物生其腹。人猶腹中蟲，蠢蠢隨化育。鑿攻無
時休，臟腑為翻覆。帝青調元氣，豈不畏戎毒。蟠然命滌蕩，汗
下兼湧蚰。蚰蚰自狂獒，涓沸交殺戮。何當瞑眩定，風止水歸
瀆。鑄鐵作鋤犁，春耕待秋熟。

二儀播元氣晝夜靡停機有生即有死化工亦何私彼狂牽
所欲冥行失康逵無航思利涉發此百禍機賊人還自賊擾
擾竟何為

郭南有窮夫黃髮對老妻見人抱兒女仰面看天啼郭北有
宕子鮮服明春閨累累倚門親疏茹乏塩醢盛年異欣戚薄
暮空噬臍達生貴知命胡為苦悲悽咬咬水中鳧谷谷墻下
雞良無返哺望乳抱何棲棲瞑目思此理惆悵中自迷

盜妬飶梁肉原思餒窮閭夷齊采薇蕨儀秦駟高車祥麟殪
西狩尼父空嘆吁天道果福善彼蒼竟何如

老眼眯昏夜見螢以為燈燈螢何足辨所悲老且膏膏老復

何用甘心就無能
逍遙麋鹿願所得
良已弘

鬼神陰陽精變化
無定迹如能禍福
人豈向人求食而
况天地心坦坦甚
正直祭祀本人情
將以牲與稷居歆
豈在物馨香薦明
德葛伯信不臧虞
公亦何益前王有
舊章敬之在無射

海鯨乘扶搖激水
騰九旻退潮觸泥
沙顛骨空嶙峋猛
虎掉尾行飲血不
滿唇吡哮逞雄攫
係首八尺緡賦命
雖在天成之亦由
人嗟嗟燈上蛾亦
豈厭其身

夷齊值明時餓死
西山陽四老生亂
世采芝以徜徉李
業遇公孫欲蓋反
受殃嚴陵辭故人
萬古清名揚性也
寔有命君

子順其常漫漫雲間鳥冥冥隨風翔海宇豈不寬六翮有短
長浩歌向日月曲盡意茫茫

感懷

昊天厭秦德瑞氣生芒砀入閔封府庫約法唯三章英雄不
世出智勇安可當叔孫一豎儒綿蕞興朝綱遂令漢禮樂遠
媿周與商逝者如飄風盛時安得常寤寐增永歎感慨心內
傷

四月陽用事群物咸長榮靡草雖就死玉瓜亦復生死生誰
所致時至莫能爭聖人洞神理守分無外營脩身俟天命萬
古全其名

自都回至通州寄普達世理原理二首

旦辭文明門回首望宮闕長雲擁蓬萊烟霧中滄鬱相去不
崇朝杳若隔溟渤扁舟指吳雲離夢縈燕月雖懷歸鄉歡復
愴知己別裁詩寄悠悠感念深至骨

西風吹青冥征鴻暮蕭蕭一辭都門去便覺京國遙輕霜入
秋鬢落英整寒條念我同年友高誼薄九霄恨我處遐遠不
得陪晨朝綿綿久要心萬里匪為遼鱣魴赴清淵孔翠依蘭
茗飛潛各有適分得無外徼佇立望閭闔傾耳聆簫韶

晚至草平驛

落日照阡陌秔稻生清香好風自西來吹我征衣裳但惜景

物佳不覺道路長
幽禽韻象茸馬足
響康莊驛吏迎我前
拜
晚進酒漿要我入
山館左右華鐙光
解鞍待朞月
星明樹蒼

送僧家奴叅政赴河東宣慰使

晨登晉陽山西北
望雲中大漠造瀚海
重關阻飛鴻昔為征
戍塲今見車軌同
相公奉明詔分符
揔元戎賦詩睇行雲
坐嘯生長風霜濃曙
角清月出黃河空
細草卧牧馬虎服
韜弧
弓天子萬歲壽
垂拱明光宮

發安谿至青田戎事急不得留有感

鷄鳴戒晨裝掛席
日尚早風亂沙上
雲雨昏江中島士
生從

王事薄質非所寶但懼筋力微任重蹟遠道昔邁園柳青今
來江楓老豺狼互滅沒憂虞何時了朝原思眷今夜船夢登
草寸步隔河山怒焉傷懷抱

天壽節同諸寓臣拜于寶林教寺禮畢登繫翠軒分
韻得稽字

宿雨霽初節群山綠如洗流霞絢琳宇旭日射丹檠鳴鍾趨
梵宮焚香望天陞遥遥蜂螳忱惓惓葵藿禮萬年主壽長百
拜臣首稽竣事陟華軒敦情屬芳醴大師祇園英聰明實神
啓諸公俱俊髦文藻壓班禰肅雍周簠簋古恠夏追蠹鹿鳴
歌辛蒿魚麗誅魴鱧劍氣星有輝珠光海無底嘉會非尋常

令德更豈弟澄心映空曠
滌慮俯清泚看竹風泠泠
折花露泥泥紆徐睇漠瀛
緬邈想淮濟巍巍世皇業
喬嶽深根柢螳螂亢齊斧
碎首堪立篋農郊卜其歲
已喜先抽薺層樓盼北極
祥光應周髀中山致麩蕪
東吳米稗米宴醑定有期
玉釭浮盞醜


題蘭花圖

亭亭石上竹嫋嫋竹下蘭
歲晚各自媚不知霜露寒
欲持贈君子路求江海寬
空山日搖落佇立起長歎

正月一日公宴分韻得恩字

青陽肇嘉歲白日間春溫
起視天宇間粲然生意存
高堂建

華蓋北面朝至尊彤雲映扶桑條風吹我幡鳴絃在兩楹肯
酒盈金罇轅門號令肅主將詩書敦彬彬衆多士矯矯鳳與
鸞廟筭得其長豺狼安足吞揆予實砮砮深慙厠璵璠敢矜
鉛刀割所望安黎元恢復舊土疆以酬生育恩



太師誠意伯劉文成公集卷之十三

後學麗水何鏗編校

五言古詩

種藿香

藿香體虛柔本自南土出
毛芒散纖葉旖旎怯朝日
芳菲挺衆卉辛美更無匹
况能已疝瘕兼理腸胃疾
種之近庭階離離看新茁
驅童斬竹枝扶植待秋實
常恐風雨惡摧折傷弱質
蒺藜生道傍延蔓何綿密
豈無荷鋤人夕薙旦已出
上天意何如感嘆靡終畢
松柏多斧斤山林日蕭瑟

北上感懷

倦鳥思一枝，櫪馬志千里。營營勞生心，出入靡定止。伊余朽
鈍材，嬾拙更無比。才疎乏世用，嗜僻惟書史。雖非濟時具，頗
識素餐耻。旣懷黎民憂，妄意古人企。寧知乖圓方，舉足輒傷
趾。塵埃百病侵，貧窶萬感累。艱難幸息肩，遲莫竊所喜。明時
登驥馱，駑馬但垂耳。自非冀北姿，莫羨追風駛。便欲解衣冠，
躬耕向桑梓。終懷葵藿戀，不慕沮溺詭。潛陽動原隰，白日曠
蘭芷。疇雞戒晨鳴，客子駕行李。縈紆越嶽嶠，浩蕩涉風水。淹
留具區北，信宿滄江汜。維時連年歉，道路多流徙。官司職撫
字，黔首皆赤子。陳紅太倉米，豐年所儲待。為民備乏困，朝廷
豈私此。推餘補不足，茲實王政始。臣子宜奉承，天威不違咫。

柰何簿書曹暴慢蔑至理苟云出納吝當閔轂鯨死嗚呼草
莽露慘惻溝瀆委聞之猶鼻酸見者宜顙泚踰淮入大河
凍更難視黃沙渺茫茫白骨積荒藟哀哉耕食場盡作狐兔
壘太平戢干戈景物未應爾意者斯人徒縱欲擾天紀鬼神
赫震怒咎戾良有以去年人食人不識弟與姊至今盜賊輩
嘯聚如蜂蟻長戈耀白雪健馬突封豕豈惟橫山澤已敢剽
城市途行絕稀少空車但墻倚身行須結集一窠四五起牧
民豈無人司寇亦有氏陣車不驅馳大田無耒耜邦家祿食
恩豈為臣奉已山東古要地燕趙猶唇齒况茲南北衝津梁
通遠邇屬當全盛時四海同一軌廟堂多稷契振舉無遺弛

勿云疥癬微不足成瘡瘡滔天起濫觴炎岡發星烜虞朝有
分北漢庭煩直指農夫植嘉穀所務誅稂秕耕耘苟失時雨
露空沾灑威懷豈異任守令職非痺端能慎黜陟此輩何足
弭故鄉隔山川前途塞荆枳青徐氣蕭索河濟俱泥滓痛哭
賈生狂長歎漆室裡何當天門開清問逮下俚

送普顏子壽赴廣西憲幕

離維荆衡南運迤走蠻徼民風雜徃登地勢帶蒙詔迢迢商
周前風水絕織竅後王務廣土懷柔倚攻剽羈縻非本情疲
痾復誰療大明俾日月幽裔靡不照化育之所加欣榮及蓬
藿憲府繩百司選擇自廊廟偏方異習俗賦性實同調培養

自殊途激揚貴知要淒涼溪上瀧鯁魚困罾釣高風吹霜鶴
縹緲集海嶠願言崇令業以繼南國召

過東昌有感

夜發高唐灣旦及東昌郭喬樹拂疎星霜飛月將落仰觀天
宇清平見原野廓白楊號悲風蔓草杳漠漠但見荆棘叢白
骨翳寒籜聖道縣日月斯人非虺蜮要教養旣迷方歎熾性乃
鑿展季骨已朽清風散藜藿絃歌滅遺音蘭絲盡籠絡鳴鳧
翹憑螽鳴草蟲躍遂令一變姿化為跖與蹻况聞太行東水
旱荐為虐飢氓與暴客表裏相倚着賑卹付群吏所務惟刻
削征討乏良謀乃反恣剽掠坐令參苓劑翻成毒腸藥今年

秋租登行止稍有託餘波尚披揭未敢開一喙但恐習俗成
何由返初昨藩宣有重寄胡不慎遠略往者諒難追來者猶
可作歌詩附里謠大猷希聖莫

南陵崔氏思梅詩

昔來梅花下綵服輝清尊今來不見人淚滴梅樹根梅落風
不回淚落化為石冥冥入幽泉一夜千萬尺

晨詣祥符寺

上馬雞始鳴入寺鐘未歇草際起微風林端淡斜月僧房湛
幽寔假寐待明發松徑斷無人經聲在清樾

送鄭希道行省掾滿之臬州錄事

鄭君廊廟姿才識天下冠若華升朝霞可望不可翫胸中富
文史蔚蔚錦繡段公餘但好客高論幹雲漢蓮風散秋幕薇
露收夕案吳雲翼行輶閩嶠入竒觀撫字俟深仁剗繁讓明
斷嘉會復何時悠悠仰飛翰

寄題僕世本東溪漁唱亭

落日去曾巒清溪澹輕浪嘔啞戢柔櫓款乃發孤唱初隨飄
風起復逐行雲颺月色照未闌灘聲雜逾壯恐有濯纓人一
聽一惆悵

發安仁驛

鷄鳴發山驛天黑路彌險烟樹出須聲風枝落螢點江秋氣

轉炎嶂濕雲難歛佇立山雨來客愁紛冉冉

發龍游

微颺獻輕涼客子中夜發秋原曠無際馬首掛高月草虫自
宮商葉露光可掇狹徑非我由周行直如髮揚鞭望南天晴
霞絢閩越

早行衢州道中

草際生曙色林端收暝煙露花泣啼臉風葉彈鳴絃農家喜
銜艾行歌向東阡大道無狹邪平原多稻田客行良不惡敢
曰從事賢

鉛山龍泉

茲山近南服勝迹冠朱方石骨入海眼地脉通混茫金精孕
清淑水德融嘉祥寒舍六月冰潤浹九里長鯨顛狎獵起虎
口呿呀張發竇旣窈窕流渠遂汪洋洞徹瑩玉鑑鏘鳴合宮
商靜含玄機妙動見大智藏養德君子類膏物農夫望野僧
向我言其功殊匪常飲之祛百邪能使俗慮忘漱嚥入靈府
喉舌生清香爽浙動毛髮飄忽凌風翔何當揚湛冽盡洗貪
濁腸

初食檳榔

檳榔紅白文包以青扶留驛吏勸我食可已瘴癘憂初驚刺
生頰漸若戟在喉紛紛花滿眼岑岑暈蒙頭將疑誤腊毒復

想致無由稍稍熱上面輕汗如珠流清涼徹肺腑粗穢無纖
留信知殷王語瞑眩疾乃瘳三復增永歎書之遺朋儔

望武夷山作

飲馬九曲溪遙望武夷峰長林抱迴合丹崖造空濛浮暉澹
寒翠水木皆曼容薄遊限塵務促景尼竒蹤緬懷紫陽子千
載誰與同瓊佩邈烟霧石函閔遺封羈旅怨幽澗飛蘿冒芳
叢瑤琴空流泉桂枝徒秋風悵望佳期阻纏綿憂思重殷勤
尺素書願寄雲間鴻

發白沙至水口

夜發白沙驛亭午至水口中流鬱風霧密雨蔽原阜冥濛蛟

龍過隱麟怒雷吼傾歌卧帆席馮翼惑前後畏途生頃刻顛
倒亂足手倉皇投山館喜懼劇紛糾攝身整衣帶沾濕及肩
肘平生歷道路艱險頗曾受未能外形骸豈敢輕衰朽捐軀
匪成仁垂堂不宜徂總轡登前嶺煙雲尚昏黝經阻有妨虞
姬文亦奔走

早發建寧至興田驛

鷄鳴戒晨裝上馬見初日露泫葉尚俯霧重山未出客途得
齊景緩步非縱佚矧茲歲有秋高下俱頽栗牛羊散原野鵝
鴨滿阡陌懷抱旣夷曠神情自清謐寒花蔓籬落候蟲響蒙
密霞標青楓林雪綻烏柏實幽覽雖云遽佳趣領已悉我行

固無期况乃塵事畢

題武夷圖

崇山莫朱維實維群山圍葱蘢薄光景隱顯變氣候百泉紫虹
蜺萬谷蒸饋留深根入無底峻表切星宿嶒峻削劍戟窈窕
錯錦繡騎雲摩高掌竇石室陰罍金雞鳴未晨玉女來自逗
琪樹縞玄宵瑤花落清晝美人遊不還霜月怨猿狖淒涼駕
壑槎蕪沒白玉樞蓬萊渺滄海弱水浩浸溜良辰不可掩沉
思令人度安得凌風翰飄飄逐飛鷺尋源挹孤清摹林摘三
秀逍遙觀物化俛仰空宇宙真詮倘可求吾將解吾綬

孔子充相送至鵝湖

憶昨過武夷欲往無與儔今茲逢故人遂得鵝湖游輕雲翼
征蓋翔風當鳴騶古塔挿蒼藹寺門啓平疇陟徑旣紆轡馮
軒亦膠流雲旗裊香霧金像明清秋昔賢論道處松柏深且
幽鴻飛湫滄海龍去空靈湫懷人已寂寞對景空淹留興闌
成遠別馬首山悠悠

自衢州至蘭溪

秋郊歛微雨霽色澄人心振策率廣路逍遙散煩襟疎煙帶
平原薄雲去高岑湛湛水凝碧離離稻垂金薺麥霜始秀玄
蟬寒更吟幽懷取虛窅好景自相尋心契清川流目翫嘉樹
林歌傳滄浪調曲繼白雪音仙山在咫尺早晚期登臨

九日舟行至桐廬

杪秋天氣佳九日更可喜衆人競登山而我獨泛水江明野
色來風淡汲鱗起蒼翠觀遠峰沈寥度清沚沙禽泛悠颺岸
竹搖蘿靡泝湍懷謝公臨瀨思嚴子紫萸空俗佩黃菊漫妖
蕊落帽非我達虛壘非我恥扣舷月娟娟濯足石齒齒澄心
以逍遙坻沅任行止

從軍詩五首送高則誠南征

少小慕曾閔窮閭兀幽棲丘園賁嘉命通籍廁金閨握筆事
空言塊焉愧梁鵠不如屬縶鞿結束習鼓鞞廟筭出帷幄白
日收虹蜺劍光帖滄溟旗尾縣鯨鯢振旅還大藩歌舞安旄

倪拂衣不受賞長揖歸蒿藜

江鄉積陰氣二月春風寒壯士縵胡纓伐鼓開洪瀾長風翼
萬軸撇若橫海翰馬銜伏轅門翊衛森牙官仗鉞指天狼怒
髮衝危冠

按節肅徒旅神劔宵有聲揮揮大旗動烈烈刀斗鳴仰看太
白高俯視滄波平王師古無戰蟪覬安足烹人言從軍惡我
言從軍好用兵非聖意伐罪乃天討運籌中堅內決勝千
里道雷霆馘蛟鼉雨露澤枯槁懷柔首惇獨延訪及黎老牧
羊必除狼種穀當去草凱歌奏大廷天子長壽考

清晨絕長江日夕次海濱北風吹旆旌軍動速若神令嚴戎

馬閑九陌無驚塵，伐鼓震溟嶠。揚帆役鮫人，鯨鱗京觀築。鰐
醢華筵春，啗啗布穀鳴。初初農鳴春，去子還故鄉。悲喜集里
鄰，荷鍤啓瓦礫。再荷天地仁，撫綏屬有望。世世為堯民。

蛟谿詩

蛟乃龍之徒，隱顯異凡質。屈蟠深壑，環靈變不可悉。清溪漲
百湍，漱滌見冽。溼寒颯，黯離晶。陰電煬幽室，超騰雲雷。倏訶
禁鬼神，謐應龍翔中。天渙汗濕箕畢，大江揚濁瀾。鼉蜃恣狂
譎，閉藏當有待。保養慎無失，搜竒凜精魄。踟步迷故術，谿巖
生長風。林木暮蕭瑟。

題林以仁平反詩卷

木伐豈再植壁毀寧復完議獄有緩死聖言垂不刊兩造旣
偏聽無辜邁凶殘况復使其孥流離播夷蠻司牧盡瞠視佐
使獨悲酸抗詞動鬼神潤澤生枯乾死者縱不生魂魄亦獲
安孤兒雖不夭且得依故山聖人邁種德惠及毛與翰云胡
任民寄視之如草管為君歌此曲歌竟起長歎

送僕世南參政分題得虎林

深林合蒙籠仰視不見日中有白額虎哮吼恣狂獠怒晴谷
搖電掉尾原皴颯牛羊困攫取樵牧萃憂恤相公鎮方面化
捷影響疾百靈肅號令萬恠悚潛逸昔出晝需朋今行夜辭
匹泰山絕悲啼牛哀返初質豈獨惠斯邦四海望寧謚

題山水小畫

谿上春始還，微波動芳燠。樹暖欲生烟，山明初過雨。美人期不來，桂楫怨蘭柱。佇立忽懷愁，漁歌起洲渚。

送田生歸鄉

少年客他鄉，還鄉反如客。莫驚新井里，乃是舊阡陌。歡笑集姻親，觴酌上班白。老翁愛英俊，慰問至日夕。應憐鄰舍兒，魚龍兩縣隔。

題李伯時畫淵明歸來圖

江左昔潰亂，桓廬遁相尋。劉裕起寒微，長驅掃氛侵。秋草雖未枯，霜雪已駸駸。陶公節義士，素食豈其心。我才非管葛，誰

能起淪沉所以歌去來
躄卧五柳陰悠悠多感
激愴恨寄謳吟哲人貴
知幾芳名留至今展圖
三歎息懷古一何深

題朱孟章虞學士送別圖後

秋郊一盃酒握手念將
離落日照野水涼風生
樹枝今朝重相憶青山
如舊時鬢毛非松柏爭
得不成絲

題老翁騎馬圖

少年遠征役及歸鬢已
霜鞍甲零落盡空餘弓
箭房老馬同死生蹴踏
沙磧長故鄉此何極仰
看鴻鴈行

明齋詩為湖廣陳進士賦

客從于闐來遺我盈尺
璧晶光射雲漢璀璨生
五色置之暗

室中鬼魅皆辟易願持自照身不用持照人

寄題江東蘭逸監司瑤芳亭

江籬悲楚佩叢桂空秋霜茲花特秀絕得升君子堂艷色非
我貴皎潔有餘光仙人美良夜鳴玉來琳琅纖雲淡華月色
映青鳳凰飄飄白霓珮左右參翱翔衆卉不敢傍瑤臺清且
涼聞有千歲實其味如瓊漿願持壽 明主天地同久長

題揭伯洪山居圖

黃埃晦城市赤日炊遼道榮華能幾何未若山居好啓扉對
平林關徑入芳草丹崖翠蘿映青嶂白雲抱世事幸見遺幽
趣堪獨討新晴景物佳緩步隨野老倚巖聽鳴弦息陰憇華

葆蜂亂覺春暄鴻驚信秋早無榮謝馳驅有酒任傾倒但願
長兒童稼穡以為寶

會稽張氏春暉堂

喬木生山阿碩實秋離離誰知茂育功乃在陽春時丈夫佩
玉玦壯氣東西馳列鼎未酬歡倚門已生悲君看斷根草引
蔓復何為逝波不可駐感激成吾詩

張子英閑止齋三首

鳥飛止茂林魚游止深淵步止辭踰語止絕悔愆虺蜃升
高壁朽殼消腥涎夸父逐羲和渴死大道邊所以知止者不
為物所牽擺落塵網嬰寂寞守自然悠悠觀群動默默全吾

年

閑居安所止自古有陶公柴門蔭高柳左右來清風檜籬密
復踈下有黃菊叢摘花泛濁醪嘯歌撫孤松駟馬耀長衢視
之如蒿蓬

築室在 cities 而無闐闐聲非關遠人世慮滌境自清圖書堆
几案花竹當簷楹釀酒香滿甕賓至卽共傾黜陟吾不知寵
辱吾不驚百歲聊復爾孰為身後名

耕雲詩三首為堵無傲作

青山何逶迤白雲自悠悠數畝幸可耕此外更何求整耨候
時雨荷鋤適東疇凱風拂蘭蕙林薄鳴鴉鳩我麥既奉奉我

禾亦油油食力分所安但願歲有秋王租及時足尊酒聊相

酬

八月白露零九月築場圃稻粱已映遂梨棗亦盈塢耕耘幸
就畢一飽諒可取斗酒烹黃鷄殷勤會田父但願守令賢邑
里得按堵無事苟安居明朝復相聚

朝耕原上雲暮宿雲間屋雲來動丹霄雲去澄翠麓坐看雲
變化卽見雲起伏斯須不可期飄忽鳥過目濯足臨寒泉息
景蔭嘉木飯蔬勿云惡無憂勝梁肉長歌招隱詩清風滿空

谷

壬辰歲八月自台州之永嘉度蒼嶺

昨暮辭赤城今朝度蒼嶺山峻路屈盤峽束迷巖景谿澗出
風門坎窞入天井冥行九地底高闕群木頂瀑泉流其中激
若洩溟滓哀猿嘯無外去鳥飛更永僕夫怨跋涉瘦馬悲項
領盜賊遁天誅平人遭灾肯佇立盼嶽岑心亂難為整

夢草堂遺懷

卽事在自得彊歌非正音所以春草句聲價重兼金若人千
載下遺響邈難尋婁涼一池塘賴爾得至今我来當杪秋天
淨潢潦沈枯荷有餘馨衰柳無殘陰鼓鞀響未已山水意
徒深感時念兄弟惻愴傷我心

在永嘉作

高屋集飛雨蕭條生早寒
我來復幾時明月缺已團
浮雲蔽青天山川杳漫漫
狐狸嘯悲風鯨鯢噴重瀾
孤雁號南飛音聲悽以酸
顧瞻望棄梓慷慨起長歎
願欲凌風翔惜哉無羽翰
中夜百感生展轉不遑安
枯荷響西池槁葉鳴林端
寥寥天宇空冉冉時節闌
舉俗愛文身誰識章甫冠
河涘未到海平陸皆驚湍
旗幟滿山澤嗚呼行路難

蛭室詩為台州棲霞觀道士作

蟾是蝦蟆精誰令居月宮
淒其羈旅身竟作蝨月蟲
我心有靈丹光與日月同
子能精鍊之可發天地矇
照灼六合外事一室中
哀哉爬沙輩局促棲樊籠

癸巳正月在杭州作

春陽動萬物衆草皆已抽
嚶鳴亦和悅我何獨懷憂
鯨鯢未殖醢豺狼滿山丘
鳳凰竄荆棘烏鳶自相求
浮雲蔽蒼穹天路阻且脩
風沙日暮起鍛羽安所投
悲來怛中懷泣涕縱橫流

江城陰氣凝積雨春淒涼
出門何所見但見瓦礫場
新廬各有前店舍亦已張
市人半荷戈使客盡戎裝
回首舊遊地慘淡寒烟黃
悵焉念所思惻愴心中傷

徘徊西湖上愴恨有所思
所思不可見涕淚下沾衣
死生一瞬息逝者安可追
狼曠信君子李陵非男兒

鍛鐵當用椎析薪當用斧拔蓼而植荼去辛還得苦峨峨九
陽門衛以豹與虎微微螻蟻忱鬱鬱不得吐

登卧龍山寫懷二十八韻

暮春時雨餘原野皆秀色流雲暖芳甸惠風暢輕翼公崇岡
低垂崇岡緬登陟山川糾紛錯疆畎互紆直淒涼神禹穴偏
佞句踐國王簡闕玄緘銅牛啓雄德霸氣浩江河王風散荆
棘感今情軫鬱懷古心愴惻東溟尚波濤中原未耕織無能
事蕭曹妄意追契稷蹇產蒐屢遷逶遲足猶側良辰復幾何
白日忽中昃周流睨圓方俯仰觀動植有水必趨東無星不
拱北宗社固神靈至尊實恭默殷王伐鬼方尚期三年克苗

頑負險阻終竟膺竄殛天戈向無前况乃誅鬼蜮竊聞海濱
民決皆疾狂慝荷父思一奮所懼官未識 朝廷鑒往轍中道
誅貪愎主將敦書詩志士願盡力諸公總英俊矯矯百夫特
愚生諒踈拙千慮冀一得農人奉壺漿遲爾珍蝨賊采薇戒
懷歸伐檀慙素食白雲在青天可望不可卽浩歌梁甫吟憂
來憑胸臆

立夏日有感

朝旦天宇清逍遙步庭除温風自遠至綠樹嘉有餘登高展
遐眺萬象各以舒念此客行久感彼時節徂退食恥尸素進
思愧庸鶩仰視日月高俯察川原紆願歆凌風翔周流觀六

虛天路脩且阻惜無竒肱車倚松翫懸蘿藉茅想連茹公叔
實尚賢審武不能愚何當脫塵鞅歸臥園田居

贈柯遂卿一首

并序

今年夏四月余至台聞柯遂卿抗言釋誣囚事甚異而偉
之夫天下之大豈無慷慨激烈之士見義而勇為之者哉
其作也非有私其進也非有求觸于其心形于其言發于
其言信于其事可不謂之大丈夫哉惜其晦而弗彰也於
是乎為之詩曰

雷霆蟄神威妖蜃躍海濱將軍戰敗死玉帳空無人腥涎之
所被蛭蠙昏蛇鱗天弧不張弦民情曷由申縣請亦令典奉

行在明仁誰令姦宄徒並緣逞頑嚚俄然齒髮軀化作豺狼
身剽金既無畏况復枉平民壯哉柯夫子義氣衝九旻曳裾
公府門抗論回星辰坐令霜雪間朽骨生陽春睨視夸毗兒
精蒐散飛塵我忽耳聞之肝膽張輪困安得似卿輩落落千
百人出應休明時翊贊臯陶臣旌別鸞與梟再使權衡均上
天意茫茫感歎空悲辛

贈周宗道六十四韻

天弓撥其弦平地躍虎狼腥風扇九澤濁霧干太陽瑣瑣蚊
與蝨亦沸如蝸蟾帝閣隔蓬萊弱水不可航螻蟻有微忱抑
塞無由揚遙遙草茅臣怒切忠憤腸披衣歛軍門披腹陳否

臧曰走居海隅詩書傳世芳感荷帝王恩祿食廁朝行走身
非已軀安得緘其吭走有目擊事敢布之廟堂永嘉浙名郡
有州曰平陽面海負山林寔維甌閩疆閩寇不到甌倚茲為
保障官司職防虞當念懷善良用民作手足愛撫勿害傷所
以獲衆心卽此是仞墻奈何縱毒滂反肆其貪攘破廩取菽
粟夷垣劫牛羊朝出繁空橐暮歸荷豐囊丁男眇上山妻女
不得將稍或違所求便以賊見戕負屈無處訴哀號動穹蒼
斬木為戈矛染紅作巾裳鳴鑼撼巖谷聚衆守村鄉官司大
驚怕棄鼓撤旗鎗竄伏草莽間股慄面玄黃窺伺不見人湍
江走倭倭可中得火伴約束歸營場順途劫寡弱又各夸身

疆將吏悉有獻歡喜賜酒觴殺賊不計數縱橫書薦章民情
大不甘怨氣結腎腸遂令父子恩化作蠶與蝗恨不斬官頭
剔骨取肉嘗纍纍野田中拜泣禱天皇願得賢宰相飛牋奏
巖廊先封尚方劍按法誅姦賊擇用忠蓋臣俾之提紀綱彎
弧落鷓鴣雉棘出鳳凰尚可存子遺耕稼納官倉失今不早
計如水决隄防而後事堙築勞費何可當足間疽初生灼艾
最為良炊成施剗割所憂動膏肓邊戎大重寄得人則金湯
龔遂到渤海盜賊還農桑張綱入廣陵健兒跪如羊苟能任
仁智勿使儉邪妨孟門雖險艱可使成康莊走非慕爵賞自
嚮高求薦揚痛惜休明時消患無其方又不忍鄉里鞠為狐兔

場陳詞未及終涕泣下滂滂旁觀髮上指側聽心中傷天路
阻且脩不得羽翼翔可憐涸轍魚待汲西江長况有蛟與蛇磨
牙塞川梁旄丘靡與同載馳徒慨慷嚴冬積玄陰天色慘以
涼衆鳥各自飛孤鸞獨徬徨冥冥麗山雲木葉殷清霜子去
慎所適我亦行歸藏

遣懷

鴻鵠會高風拂翼凌雲霓蛟龍不得水葺鱗困塗泥惟昔望
諸君一戰舉疆齊秦穆伯西戎能用百里奚傳說築商巖太
公釣磻溪韓信寄食飲孔明躬耕犁立賢苟無方曷問鷲與
鷲驅車上太行峻極不可躋重雲蔽層岑流潦絕荒蹊豺狼

當我嗥魑魅向我啼顧瞻望九州欲去惑東西嘉穀委蔓草
良田養蒿藜乘黃避跛鼈狐貉驕虎貔誰言縱壑魚竟為觸
藩羝長夜起嘯嘆邪氣憑我臍夢登舜蒼梧遙望禹會稽援
琴奏將歸日暮增慘悽盲飈正滄勃孤鳳將安棲

三月八日偕徐成中楊澄源李子庚吳溥泉董朝宗
黃中立程邦民湯仲謀王文明遊南鎮得禽字

積雨霽芳甸凱風來遠林逍遙出郊郭徙倚散煩襟桂棹蕩
清漣長裾曳輕陰肆覽夏王陵流觀秦帝岑黃熊安所之荒
楚自蕭森仰翫卉木榮俯聆泉石音洋洋潭底魚喈喈枝上
禽昭融見天德滉漾怡人心况有文彥友溫恭比瑤琳獻酬

禮不愆詠歌思彌深良辰豈易得嘉會難屢尋願作膠與
漆無為商與參殷勤屬此章莫以代兼金

送馬生遊京師

東山夜雨急鑑湖春水深之子遠于邁祖帳清江潯白日映
蘭皋青烟起松岑豔舞激回風長歌裊哀音何以慰離懷八
珍盈金鬻何以將素情贈言比瑤琳京畿佳麗地多士紛如
林構厦後檀栳去疾湏苓參殷勤治安策悃款大寶箴敷陳
草茅情啓迪帝王心斯人邈永矣繼之在于今勿羨蘇季子
自侈多黃金

別峯和尚方丈題唐子華山陰圖

連山走陂陀太谷入晻曖
屋藏深樹中路出巨石背
烟雨時有無澗谷互顯晦
輕盈曳飛綃縹緲沃浮黛
雄梁矯脩鼉駢壁駁文璫
崢嶸紫霞高屈曲白水匯
陰森神鬼宅奮迅龍馬隊
風雲氣象寬日月光烟碎
借問此何鄉或有捐余佩
蒼云越山陰信美無與對
自從永和來燕遊推勝槩
佳人去不還盛集嗟未再
唐令實好奇掇拾歸畫繪
上人遠公徒我亦淵明輩
會晤屬時艱觀覽增感慨
故園沒灌莽舉足蛇豕礙
放歌自太息激烈驚厚載

送孔世川赴江西儒學提舉

鏡湖荷花發耶溪菱葉生
送君何所之去作西江行
西江大

藩地卓犖多豪英文能綯雲漢武能壯于城浩蕩吳楚間頽
波障東傾鳳凰不妄集梧桐匪空榮行行勿憚遠躑躅崇令
名

我辭西江歸倏忽十二秋每望西江雲思心悵悠悠恨無排
風翼安能凌虛游故人渺天末可夢不可求邂逅送子行感
我涕泗流登山有脩蛇涉水有長虬逝者如零雨一落誰能
收

為竺西和尚題谿山茅屋圖

青山十畝餘茅屋數間足高樹結浮烟脩篁茂深綠孤松無
鄰舍生理不拘束開田種禾稻間以黍與粟中歲幸西成青

黃被谿曲鳧鷖與鴻鴈亦各得所欲清秋霽涼雨礧底石如
玉野老時見過杯酒聊與屬但願官長庶吏卒莫我毒耕稼
納王租世世還相續

春谷詩為竺西和尚賦

條風自東來雪消春谷暖荒畦碧草短清池細泉緩谿花明
錦繡時禽響弦筦道人閑無事習慣牛頭嬾過橋禪杖落坐
石架柴袒日暮精舍歸燈龕白雲滿

四月二十二日郊外游得水字

草根螻蝻鳴湖上蕪葭靡繁林媚深綠清池散圓紫離居昧
節序陶情賴佳士泛舟出郊甸緩涉信所履壺觴展倡酬及

此晴日美嘯歌望山川慷慨集悲喜豺狼未弔鑊郊野尚多
壘鐵衣掛儒冠好爵建麻屣吾儕幸味苦得似道傍李無思
身外憂適意聊復爾歸雲入禹穴返照射宛委烏啼樹有風
帆過煙生水興盡各言還月明城角起

題枯木圖

松以直而伐桂以芳而攻睠此屈曲形擁腫又空中身為螻
蟻家根作蟻螬宮蠹皮化土壤朽腐不可烘輪囷盤石間幾
歲經霜風明堂構群材梯梁匝涇隴斧斤獨不到凋落還芘
芘知兵牘孫子善射殲有窮胥種伏短劍韓彭歎良弓豈如
蚩蚩氓負薪翳蒿蓬飢食渴則飲不識王與公白髮死枕席

無事傷其躬贈詩持盡還去尋黃綺翁

五月三日會王氏南樓得激字

蹇步屬時艱睽違苦多感偶寄越城隅頗喜得幽寂炎夏天
象明群山皎如滌况有文獻友同心不離迭雖無昂俎盛斗
酒聊相覓登樓望禹穴慷慨生感激玄珠淪赤水金簡不可
覲崩騰六合內慘淡多羽檄天弧弛虛鼓封豕逃碁鎖惟見
野田中白骨雜瓦礫憂來歌一曲客淚再三滴晚風吹晴霞
海色映石壁展詩肆遐眺嚴令困勅敵諸公俱鳳麟愧我獨
樗櫟危途知驥駟勉旃樹功績無然學兒女愴恨山陽笛

題西旅獻葵圖

鳴鳳啓至德鎬京作王家萬國戴元后懷柔無邇遐迭矣裔
夷人占風慕中華毳服耳金鏹拳毛眼窈窪獻契越重譯辛
苦涉流沙歸仁自彼心務廣匪予夸譽塞大廷臣忠告猶咨嗟
卜年盈八百分得未為奢云胡叔世主黷武生誼擘枸醬毒
南徼河源詫西槎哀哀萬夫命驅以易驪駟暴茂文祖訓大
貽天下瑕畫圖漫寫形索意良無涯太康焚雉頭宮闈茁妖
芽開元灰組繡驪岫荒淫哇夫豈不有初蕩心生百邪望美
洛陽都赤符炳流霞玉關閉高門軍賓絕相加鳩杖老貌貅
扇落藹桑麻煌煌中興業奕奕流芳葩謙光信受益知足復
何差感事重懷古因書戒矜誇

題錢舜舉折枝山茶

歲暮寒氣結百卉無遺榮
懿此獨不凋方冬燁紅英
有似節義士特立不爽貞
幽居屏紛雜丹鉛寄深情
葱蘢翠雲翹綴以沝霞精
玄霜避晨豔華月助宵明
坐令桃與李無言愧微生
贈詩勿遐棄貴之比瑤瓊

遣興六首

避地適他鄉息肩謝羈束
生事未有涯暫止聊自足
南園實清曠可以永幽獨
層樓面群山俯見湖水綠
雜英被郊甸魚鳥得棲宿
登臨且慰意未暇計遠躅
聖賢有遺訓知命夫何

積雨蕪數旬天氣涼有餘青苔交戶庭始覺人跡踈地主多
閑園可以種我蔬兒童四五人蔓草相與鋤既倦則歸休卧
閤床讀書無事且為樂何者為名譽

夏日苦太長夜景良可愛華月吐曾岑遙天碧如黛披衣更
登樓稽山正相對澄湖晶空明浮雲去無礙遺榮世何人賀
老今不在涼風吹毛髮坐久增感慨

溽暑百體倦晚涼正堪眠飛蚊何營營繞鬢鳴相煎拍之
不勝多揮去還復前世亂有骨肉逃生幸完全細微何足較
此意誰當傳

綠樹何陰陰良苗亦離離開窓招遠風赤鯉曜清池雲日釀

晴光芰荷有餘姿宴坐偶自得悠然遂忘飢富貴不可求守
分勿復疑

迂踈乏世用矯情非所安投簪謝時輩聊得心中寬回首望
故鄉枳棘日以繁譬彼水上萍隨流且盤桓樓頭好山色晴
雨皆可觀未知明朝事且盡今日歡

久雨壞墻園蔬盡壓帳然成詩

晚歲逼豺狼漂搖去鄉土囊橐罄留儲釜甑恒若窳開畦種
蔬菜撥借荷地主晨興率童稚樹藝躬偃倭瓠實正纍離茄
花亦爭吐魚肉方絕交恃此當醢脯悲風吹江干浩蕩十日
雨幽泉湧陰竇高墉圻脩堵蒼蔓壓泥沙朱苞埋宿莽淒涼

紫芝英乃與朝菌腐數竒值時危一飽不敢取天地有窮愁
每望貧家聚青苔滿頽墻日暮空倚柱

題鮮于伯機書杜工部詩後

少陵昔避亂買屋西枝村卜鄰得贄公聊可與晤言四郊闕
豺扃煙塵塞乾坤中宵望北辰慘戚衰老魂我今亦漂泊不
得歸本根感此一太息歎語聲復吞

次韻和脫因宗道感興三首

索居守貞素久已忘世機晨興夕還寐不知時節違庭前有
芳樹宿昔容顏非巢鳥去安之寒蟬鳴亦稀居人歌北風客
子歎無衣浮雲結陰翳白日少光輝鴻鴈踰南翔蟋蟀在中

關榮華如流水一往何當歸

松栢守孤直不爭桃李色明星在青天有時化為石春風車
馬塵竟日翳紫陌寧知禾黍地舊是王侯宅蓬萊有仙藥求
之不可得霜風吹林木歲暮徒愴惻

鈇刀方用世掛壁干將閒剪松養荆棘匠石空悲酸驅車陔
大行日暮多險艱玄冰膠大谷脫粟貴琅玕魑魅攬人魂豺
狼食人肝路遠無羽翼何由得飛還

題春江送別圖

春江水悠悠行人上蘭舟春雲散江樹行人重回顧嘉會未
有期離心渺千里願作還山雲莫作東流水

琴清堂詩

亭亭嶧陽桐，斲為綠綺琴。
絙之朱絲絃，彈我白雪音。
虛堂夜迢迢，華月耿踈林。
鳳凰天上来，虬龍水中吟。
曲罷起太息，無人知此心。

田家

田家無所求，所求在衣食。
丈夫事耕稼，婦女攻紡績。
侵晨荷鋤出，暮夜不遑息。
飽暖匪天降，賴爾筋與力。
租稅所從來，官府宜愛惜。
如何恣刻剝，滲漉盡涓滴。
怪當休明時，狼藉多盜賊。
豈無仁義矛，可以弭鋒鏑。
安得廉循吏，與國共欣悵。
清心罷苞苴，首養民瘼國脉。

渡江遺懷

東風吹滄江白日照花柳山川半顯晦積雨晴未久青陽好
氣候群物競苞剖農夫荷鋤犁各自登隴畝鳴鳩鳴相應陂
水光瀏瀏天地起戈兵荆榛塞原阜茲邦特按堵庶足憇奔
走故鄉有園田委棄沒藜莠老母年八十頭童齒牙朽癡兒
始垂髫出入寡朋友衣衾雜絮毳美食乏菘韭儻然多病身
全家倚糊口那今更遠去憂念成疾首千金聘宿瘤顧謂西
施醜監車摧太行驂騑不如狗况我駑蹇質困踣畏培塿濟
河須巨舫將焉用罍缶朱弦絙琴瑟曷中洪鐘紐剡蒿射犀
革空貽養由咎巍巍神祖烈乾坤讓高厚蠢茲蛇豕儔乘間

恣哮吼非無熊羆臣土產分左右更張吾豈能習慣彼已狙
鹿麋曾傷扇宵邁龍言狸瓜寤言亂心緒忽若醉醇酒踈賤等
蚍蜉捐驅復何有夷吾匪每生鞠育未宜負愴恨憶松楸淚
濕蓬鬢垢道途正艱阻進退維窅白向風一陳情何由達南
斗

題山水圖

江上何所有高低千萬峰結廬覆以茅取足聊自容綠樹旣
蒨鬱清溪亦溶溶地僻無車馬猿鳥得相從日落沙際明寒
煙澹踈松蒼茫雲霞外隱見青芙蓉悠然一舸還好景時獨
逢歸來山月出古刹鳴昏鐘

若耶溪杳郭深居精舍

上人好山居入山惟恐淺紆餘涉淵云結構依巖嶂岡巒外
挺拔水木終隱顯其前對鵝鼻突兀正冠冕其傍連木禾積
翠森偃蹇後有獅子巖皆峯露齟齬春花炫陽林秋草馥陰
畎高通雲雨過側見星斗轉桃源不遠求箕穎安足踐我來
三伏涼羈懷忽如展談經道心融聽瀟俗慮翦疎窓夜深啓
孤月掛遙峴空濛白毫光閃爍動岕巘何當此卜隣永用辭
澆酒

大熱遣懷

盛夏火用事長日不可堪熱汗發我膚如泉溢穹嶷清晨登

樓望四野皆紅嵐坡坵會稽山縹緲浮鬱藍何由作雨澤一
洗喝與酣湏臾玻璃盤湧出琉璃潭雜氣若絳旂飄颻散空
哈朱光斐九幽天色熇以醑樹木首咸俯鳥獸聲盡黯玄冥
將禺彊側身入控龕淵蛇茸短鱗山龜灼枯鷗悍熊伏朝鼯困
龍縮秋蠶焦根裂埴斷斃鷓蚌脯含水井為湯池冶容成病領
渡水翅帖帖守門口訥訥蝸塘輕綃翼依陰萃楓柎沸涓泊靜
寂噪聒亂語談蒼蠅丹砂頭群飛逐烹腊拍之適汚手驅之
死仍耽對食憚下脘引飲輒傾甌撫几炎歆燎披衣重猶函
慨彼征戍卒荷戟忘寢窳棄絕骨肉愛不得同苦甘但聞盜
賊熾未見工師戡郊原虜掠遍餽餉那能單况乃隆暑節蒸

爵非所諳用兵貴拙速將帥當懷慙沈冥及暮鼓兩目脂流
泫拂袖招遠風衆星爛天南河漢上昭回烟霞遠鬢髮且喜
辰極明願覩戎馬倏雲門連鏡湖林壑清且涵豈惟隔埃壘
庶足憇負擔惜無五畝宅偃蹇投吾簪

六月十八日自天章入城作

天淨山氣涼溪渾夜來雨籃輿度踈翠初日照平楚高林半
長烟好鳥時自語煩襟得蕭散似欲忘羈旅何當盜賊息比
屋豐禾忝逍遙丘壑間鹿麋以為伍

晚同方舟上人登師子巖作

落日下前峰輕烟生遠林雲霞媚餘姿松栢澹清陰振策縱

幽步披榛陟層岑
槿花籬上明莎雞
中閒吟涼風自西來
颺吹我襟榮華能幾時
搖落方自今
逝川無停波急弦有哀
音顧瞻望四方悵焉愁思深

七月四日自深谷之靈峰作

平旦出雲門亭午至靈峰山
盤澗縈紆谷深巖錯重竹露滴
皎皎林霞散溶溶度石苔
蘚滑披蘿烟靄濃頗喜禾黍成可
以慰老農野草各有花照水似
銜容徐行恐觸熱聊憇
崕下松時聞幽鳥鳴亦足
開心胸慨懷陶隱居丹竈
今無蹤干將與莫邪俱已
化為龍空餘遠山色
菡萏青芙蓉

清脩院良上人浸月軒

華池浸皓月高下共清瑩炯如長明燈飛入大圓鏡又疑鉛
汞爐伏火發宵映層軒開九秋萬象出昏暝月來池色動月
去池色定窺臨足遊適翫味見心性珍重無生侶於焉託清
淨宴坐六塵空百魔從律令

普濟寺用恭行已上人韻

偶從靈峰來遂作雙峰遊雙峰何峨峨俯映耶溪流炎天正
埃藨欲往安所投喜見農事成秔稻滿中立步入古寺門信
美無與儔淥池對徑路水木自深幽飛蘿冒松柏上有猿與
猴登樓散煩熱坐挹山綢繆更愛山下泉冷冷洩陰溝青苔
闕脩竹竟日涼風留披軒眺西崖煥若丹霞浮神劔去安之

越望空斗牛
沉思終永夜
月白銀潢秋

題陸放翁晚興詩後

雄劍閔寶匣
中夜蛟龍吼
男兒抱志氣
寧肯甘衰朽
松栴在深谷
枝葉拂星斗
雖無般匠顧
勢自凌培塿
昂昂商山翁
矯渭濱叟
林泉不遐遺
軒冕亦固有
奈何劉伶輩
賤身若芻狗
徒生天地間
辜負髮與手
三復詠斯章
千載吾尚友

題商學士寒林圖

昔聞商學士
水墨稱絕藝
今觀寒林圖
信美無與儷
淒涼霰雪餘
簸掃悉輕脆
玄冰刮老骨
衣被荷纖荔
龍鬚結瓊瑤
虎爪出鋒銳
鱗皴蝮蛇殼
璀璨錯琅玕
帶下有不死
石藍汁沃鬣

鬢前有赴海湍漱濯沙土細青烟曼遙渚白日淡荒裔蒼茫
浮雲外縹緲惑盼昧梧桐早飄落鳳鳥將焉逝四序若循環
歲華在指騎衰榮各有時至道惟冥契

題雜畫卷子

山川出雲霓谿谷藏虎豹枯樹繒綾身恠石礪碧貌竹枝如
琅玕烟雨昏暮罩梅花雪中開的礫珠磊砢蘭獨稱國香嫋
麗最可樂萋纖草堪籍傷覃棘能孤宋公學元暉駭歎見騰
鼯老班性嗜酒藻思發餘醇丹丘泣龍髯零落江湖權頭王
食敗筆得米動盈窖僧明本靜者一藝起衆闢展卷見歷歷
聊足解喧高裁詩慕韓豪瑱細非所較

題宋子章效米元暉山水圖

昔時米南宮父子同畫癖油然煙雨態千里入盈尺近代宋
尚書筆意妙欲逼置之几格間新舊莫辨識應是前後身神
會造化迹鴻濛迷日月瀕洞飛霹靂蒼岷晦中斷天闕杳高
隔洪濤漲無倪龍虎移窟宅農夫怨昏墊樵牧絕行跡破屋
兩三家搖撼已傾側得非杜少陵無乃陶彭澤簷茅委泥
潭籬菊沒徭籍空江乏舟楫汗漫安所適披圖瞻青冥惆悵
至終夕

為賈性之賦松石

老松不構厦潛跡歸后土千年化為石詭怪驚地府鄩都壯

輪奐翦截就梁柱嶙峋鋸鑿餘棄置人得取君家赤玻璃光
采奪朝昫噌嶮鐵心堅璀璨霞色古何當呼吳是匠以脩月
斧持厭女媧皇天鑄或可補

有客來欵我

有客來欵我自謂儒者儔問我胡不出乃來此淹留我咲而
不答彼問方未休彼我異所志問答寧相投青山屋外高溝
水山下流隱几書一卷寒簷雀啾啾

題趙文敏公畫松

吳興昔王孫能畫世莫及觀其二松圖矯若龍出勢蟠根破
坤輿拔萃滙原隰交加各軒翥則方相倚立鬣鱗撐空青豕

鬣振颯飄高藏日月氣清滴雲霧汁垂釣者何人短棹非妄
集五湖多風濤蛟蜃頭角解不如洿澤間取足鱖與鰕倦眠
松影下百竅清涼入慎勿驚松枝天寒衣袂濕

題三香圖

梅是玉堂花和羹有佳實水仙如淑女婉婉抱貞質山礬直
而勁野處似隱逸分類族雖三論德性乃一瓊臺取清夜涼
月白勝日霏霏芳氣交粲粲華采溢琪樹讓晶熒瑤草愧私
暱願言永其歡歲莫保終吉

感時述事十首

天王有萬國撫治不能徧百僚分所司控制倚方面旬宣貴

澗洽付託屬隆眷易置苟無恒勤怠朝夕變自非敦氏儔何
官匪郵傳矧茲世多故軍府希閒宴戎機一以失蟻穴債臺
殿公庭委舊事書牘呈新選來者且遲遲在者同秋燕偷安
待日至退託從私便姦貪遂乘隙民病孰與嘻大臣因柱石
憂喜相連纏反躬既遺闕何以率州縣寄與要津人有舌未
宜燕

十羊煩九牧自古貽咲嗤任賢苟不貳焉用多人為師行仰
供給州縣方告疲差徭逮所歷忝官有權宜奈何乘此勢爭
先植其私百司並效尤貨賄縱橫飛列坐隘公堂號令紛披
離名稱到輿隸混雜無尊卑正官反差出道路不停馳徇祿

積日月官吏之所希此輩欲何求脫剝圖身肥

世皇一宇宙四海均惠慈盜賊乘間發咎實由官司云胡未
悔禍救焚用膏脂姻婭遂連茹公介棄草茨農郊日增壘良
民死無期天關深虎豹欲語當因誰

先王制民產曷分兵與農三時事耕稼閱武在嚴冬亂略齊
憤疾戰伐厥有庸那令異編籍自使殊心胸坐食不知恩怙
勢含威克將官用世襲生長值時雍豈惟昧韜略且不習擊
剽悍卒等驕子有令亦無從跳踉恣豪橫鼓氣陵愚蠢所以
喪紀律安能當賊鋒崩騰去部曲蟻合尋歸蹤時方務姑息
枉法稱寬容寧知養豺虎反噬中自鍾國家立制度恃此為

垣墉積弊有根源終成腸肺癰何由復古道一視均堯封
豢狗不噬禦星馳募民兵民盡烏合何以壯干城百姓雖
云庶教養素無行譬彼原上草自死還自生安知徇大義捐
命為父兄利財來應召早懷逃竄情出門即剽掠所過沸如
羹總戎無節制顛倒迷章程威權付便嬖賞罰昧公平饑寒
莫與恤銳挫怨乃萌見賊不須多奔潰土瓦傾旌旗委曲野
鳥雀噪空營將軍與左右相碩目但瞠此事已習慣智巧莫
能爭廟堂忽遠筭胸次猜疑并豈乏計策士用之非至誠德
威兩不立何以御群氓慷慨思古人惻愴淚沾纓

古人有戰伐誅暴以安民今人尚殺戮無問豹與麟濫官舞

國法致亂有其因何為昧自反一體含怒嗔斬艾若草芥虜掠無涯津况乃多橫歛殃禍動輒臻人情各畏死誰能坐捐身所以生念慮嘯聚依荆榛暴寡憚強梁官政惟因循將帥各有心貌若越與秦遷延相顧望退託文移頻坐食挫戎梳養虺交蛇鱗遂令耕耒子盡化為頑嚚大權付非類重以貽笑顰鼠璞方取貴和璧非所珍但恐胥及溺是用懷悲辛

五谿舊三苗蛇蚓相雜處其人近禽獸巢穴依險阻起君任情歆鬪狠競瓜瓞况能識君臣且不顧子父所以稱為凶分北勞舜禹先朝慎羈縻罔俾來中土胡為倏而至馳驟如風雨見賊但趨趨逢民輒俘虜腰纏皆金銀衣被俱繡組所過

惡少年改服投其伍農家劫掠盡何人種禾黍盜賊有根源
厥咎由官府任將匪能賢敗屺乃自取竒材何代無推誠即
心膂誰哉倡此計延寇入堂宇割鼻救眼睛於身竟奚補浙
西耕業地百載安生聚自從甲兵興徵歛空軸杼疲氓真可
憐忍令飼豺虎追憶至元年憂來傷肺腑

虞刑論小故夏誓殄渠魁好生雖大德縱惡非聖裁官吏逞
貪婪樹怨結禍胎法當究其源剪鋤去根荄蒙龍曲全宥駕
患於後來濫觴不埋塞滔天谷陵頽總戎用高官沐猴戴毋
頤王帳飲酒肉士卒食菜藿未戰已離心望風遂崩摧招安
乃倡議和者聲如雷天高豹關遠日月照不該俱曰賊有神

討之則蒙災大臣恐及已相視若術枚阿諛就姑息華綬被
死灰姦宄爭效充無風自揚埃嘯聚逞強力謂是爵祿媒黎
民亦何辜骨肉散草萊傾家事守禦反以結嫌猜慟哭浮雲
黑悲風為徘徊赤子母不憐不如絕其胚養梟逐鳳凰此事
天所哀胡為尚靡定顛倒胫與頰春秋戒肆眚念此良悠哉

八政首食貨錢幣通有無國朝幣用楮流行比金珠至今垂
百年轉布彌寰區此物豈足貴實由威令敷廟堂喜新政躁
議違老夫悠悠祖宗訓變之在朝瞞瞿然駭群目疑恠仍抑
揄至寶惟艱得韞櫝斯藏諸假令多若土賤棄復誰沽錢幣
相比較好醜天然殊譬彼絺與綌長短價相如互市從所取

孰肯要其脩此理實易解無用論智愚矧茲四海內五載橫
戈父赤子投枳棘不知所歸途一口當萬喙唇縮舌亦瘖導
水必尋源源達流乃䟽藝木必培根根固葉不枯慎勿庸迹
言揚火自焚軀尚克詰戎兵丕顯厥祖謨

惟民食為命王政之所先海澨實天物厥利何可專貪臣務
聚財張羅密於羶厲禁及魚鰕鹵水不得煎出門即陷阱舉
足遭纏牽包然用鞭箠冤痛聲相連高牙開怨府積貨重姦
權分攤筭戶口滲漉盡微涓官征勢既迫私販理則然遂令
無賴兒睚眦操戈鋌出沒山谷裏陸梁江海邊橫行荷篋籠
方駕列船絃拒捕斥後懦爭疆夸直前盜賊由此起狼藉成

蔓延先王務廣德如川出涿淵外本而內末民俗隨之遷自
從甲兵興奄忽五六年借籌討得喪耗費倍萬千回憶至元
初禁網踈且平家家有衣食畏刑思保全後來法轉細百體
皆拘攣厚利入私家官府任其愆大哉乃祖訓典章尚流傳
有舉斯可復庶用康迺遭

秦皇縣九宇三代法乃變漢祖都咸陽一統制荒甸豪雄既
鏟削瘡痍獲休宴文皇繼鴻業垂拱未央殿累歲減田租頻
年賜縑絹太倉積陳紅園府朽貫線是時江南粟未盡輸赤
縣方今貢賦區兩際日月竊胡為倚東吳轉餉給豐饍徑危
昌不測勢與蛟龍戰遂令鯨與鯢掉尾乘利便扼吭要國寵

金紫被下賤忠良怒切齒姦宄競攀援包羞屈政典尾大不
可轉聖人別九州田賦揚為殿中原一何臆所務非所先幽
風重稼穡王業丘山奠夫征厲末習孰敢事游燕哀哉罔稽
古生齒徒蕃羨一耕而十食何以奉征繕長歌寄愁思涕淚
如沝霰

丙申二月別紹興諸公

勞生屬時艱將老萃憂戚風塵隘九野何土為樂國茲邦控
吳越名勝聞自昔湖山競竒麗物產亦充斥交遊尚質儉而
不事華飾况有良友朋時來慰岑寂全家免寒餓幾欲忘旅
客胡為復舍此僂俛就行役軒車遠追送酒至淚輒滴還鄉

人所樂我獨愁苦劇故山有松栢摧折為荆棘豈無骨肉親
太半生死隔此語不可聞此景那堪覲愁情如波濤頰洞胸
與臆佇立向穹蒼一歎雙鬢白

雨中雜詩四首

久晴思得雨旣雨久復厭廣庭屯陰氣平陸就昏墊淒風吹
人寒朱火黯無燄水衣上高墉泉溜發枯塹青泥沒遠道寸
步不可覘慷慨成感傷纏綿積憂念

首夏涼風生朝樹結晚色濛濛細雨交慘慘原野黑衡門長
藜莠壞壁穿荆棘念彼征戍兒沾濕荷戈戟囊橐罄留贖
菽難充食供輸既乏絕戰鬪何時息巢居者誰子鼠竄延晷

刻田疇沒蓬蒿無處勤爾力旻天高寥寥仰視不可極
多雨損萬物草爛麥生耳青苔獨得時延曼及堂祀晨興視
天宇滴瀝殊未已君子懼陸沉小人憂餓死婁涼大將營鼓
纒弧弓弛朝廷竟知否盜賊如流水

離居感時節寤寐不遑安青燈晦壁角簷溜如崩湍屈指計
日月殷憂集多端蛙黽爾何知叫噪喧草莞中夜攬衾裯淒
淒陰氣寒鳳凰鍛羽翼卑飛避鷓鴣為撫几一長歎聲出心已
酸

次胡元望郊行詩韻

誰言公館清晨氣晚未散豈乏樹葱芊尚有花爛熳美人隔

巷陌可念不可喚温温夜光璧幽北潜璀璨鄙夫競喧譁達
士善大觀世情如秋蓮零落風中瓣少年喜紛紜談咲輕絳
灌進取務出奇周慮非習慣逝水難重迴芳時愁坐換元臣
鎮方面邊戎仰成筭應憐四郊外荆棘滿耕畔悽悽憂葵女
惻惻撫床瓘興懷增感傷展轉過夜半起行視青天星河色
凌亂安能作野馬脫略謝羈絆

秋夜感懷東石末公申之

不寐知夜長起視天宇闊散漫草上風朦朧雲間月寒禽鳴
踈樹黃葉墮階闌俛仰觀群物惆悵不敢發誰云螻螳壤能
使泰山飭蒼鷹鐵六翮狡兔營三窟何當威弧正王旅得肆

伐茵輅雖微材尚可施羽管豈意風浪舟心猶隔胡越士生
非金玉有足難自達周發不恤緯楚放常懷闕平生葵藿情
忍與霜露歇玄冰膠坤軸非君孰能幹申章匪繁辭悲憤不
可遏

次韻和石末公用元望韻遣興見寄

鶉鳩勸春耕桴鼓帖宵還拊循餘暇日珠玉生咳唾時維青
陽初天子在左个布德順木令萬國罔不和祿食自紛紜撫
字誰最課幅員若金甌絲髮無墨破滄溜可摧山機禍不在
大中夜登高樓遙瞻太微座乾坤淋寥落日月飛鳥過憤惋
空有心盛時嗟已嗟

以野狸餉石末公因侑以詩

野狸性狡循夜動晝則潛繫之籠檻中耳弭口不呻當其得意時足爪長且鋸跳踉逞俊捷攫噬靡有厭貧家養一雞莫用易米鹽爾黠弗自食尋聲竊窺覘破柵舔肉血淋漓汗毛鬣老幼起頓足心如刺刀鑣東鄰借筌蹄西鄰呼徹儉繫餌翳叢灌設伏抽陰鈴彼機歛已發此欲方未飲絲繩急纏繞四體如羈黏野人大喜慰不敢私烹爇持來請科斷數罪施剗荆使君鎮方面殘賊職所殲械送致麾下束縛仍加絀腥膏忝污鉞羶齒或可醢芣芳和糟醬頒賜警不廉黃雀利螳螂碎首泥塗露烏鴉殉腐肉噴墨身受淹此物亦足戒申章

匪虛誦

和石末公種棘用胡元望韻

力役困年侵種棘代遮邏豫防苟無失有地孰敢唾風條曲
抽乙雨葉細垂个是時春載陽土脉如膏和分彊督莚植勤
惰各有課揮鋤綠烟披轉石蒼蘚破稍看萌蘖長漸覩根株
大結蔭冒長堤開花映高座徠公不敢窺貉子那得過慨慕
陶公言罔俾分陰暎

得令字

勾芒發陳根坳斗轉東柄衆星各參差威弧何時正好生雖
聖心明刑亦王政哲人慎謀始斯焉獲終慶徒言兩階舞可

以懷逆命不見三危山萬里竄梟獍世德異唐虞民情好爭
競那無跗扁醫而有膏肓病波濤地軸孰虎豹天關夏雨露
當春滋風霜及秋勁誰能奉明主順天行號令

正月廿三日得台州黃元徽書有感三首

世亂網恢恢斯人亦淪翳數竒當何如窮途難為計盲風振
喬木碩果失其蒂扇豹落機檻坐服輿阜制玄珠迷罔象白
日慘陰曠涉水水有蛟入山山有羸棄馬感須無直道懷柳
惠青冥無羽翼悲來夜迢遞

結交無疏戚艱難見平生金石苟不渝萬里如兩楹重山非
云遠邈若遼與荆燕媿豈不懷蛇虺正驕獍手持故人書心

念故人情開書問故人淚下如雨傾

客從何鄉來遺我尺素書道路險且艱故人情有餘妖氣晦
斗極黃濁混龍魚何荃不為猶何麟不為驅殷勤故人心炯
若明月珠投之千丈泥萬古光不渝安得致閭闔以照君王
車

次韻和石末公春雨見寄

愁陰沴陽景孟春猶苦寒騰雲湧巖岫落雪蔽江干街衢溢
黃潦井谷生狂瀾誤疑蛙黽窟中有蛟龍蟠復憂扶葉日坐
為黃濁漫顧瞻望四郊側足不遑安却秦慕魯連存齊想田
單玄髮雖向改壯心終靡殫小人務苟且君子慚素餐高牙

對多壘肉食徒王官周網雖云弛一匡賴齊桓莫驚溝澮盈
兩息當自乾

次韻和石末公春日感懷

下澤潢潦集幽林光景遲羈禽有哀響槁葉無半姿梁稊不
同畝世事久當遺便欲駕扁舟泛彼湖上漪慨懷祈招賦愴
惻感遐思流光逐飄風去若六馬馳干戈尚雜選舉目多可
悲步登西城憐還望東城陴近悼春陵吟遠傷鴻鴈詩未能
已然怒矧暇防咲嗤賴有賢大夫直道人欺相期各努力
共濟艱難時

紫虛周道士還俗多年而貧老如故元帥石末公憐

其無依復令歸觀就養

白鶴棲青松願與人世違
松高風露寒却向人間飛
江湖無稻梁歲莫將疇
依稀首浮丘公涕淚灑
毛衣浮丘憐老鶴解悟
既往非浴以丹池泉照
以若木暉儵然骨髓清
還向青松歸松葉烟茸
茸松華霧菲菲可棲復
可食其樂天下稀如何
從鴈鷺喋呷圖身肥

偶興

勞人怨長途壯士悲老別
那將望鄉心對此傷神月
淒涼寒風至惆悵芳草歇
瑤琴無子期絲弦為君絕

雜感

畸窮傷往事晚莫悔前非流光不相待逝川那可追佳期隔
河漢日夕千里思鴻鴈西北來安能從之飛佇立望明月天
霜夜沾衣

黃慎之自閩見訪夜坐對酌悵然有感

故人一為別七見秋夕月今日見故人故人鬚髮新世情如
鬚髮故人當識察車輪東北馳車轂終不移

倦暑伏管劑白汗如流瀉開門見故人謂是天上下新人各
自媚故人何為者斧斤入山林松柏化灰地寄語風胡子莫
恠金躍冶

煌煌華燭輝扇扇飛蛾翼羲和倚扶桑恨無夸父力大鵬雖

有能萬里亦一息可憐千斤牛坐受鼯鼠食

故人髮猶黑故人心尚赤人生一世間幾見駒過隙南山有
喬松翠鷓鬪顏色般倏不收錄野火恣焚炙枝枯榦亦折雪
霰交洒浙中心有流液入地化為石遺之五百年猶堪補青
天

鄭同夫餞別圖詩

江上潮始白林端霞半紫微風颺歸帆紅葉暎行子芳醪恥
金樽清歌猶在耳馬鳴不見人愁來若流水

旅興五十首

初秋積雨過衆綠光如濡莎雞啼高樹蟋蟀鳴堦除時物已

改故芳年從此徂榮名非我願守分敢求餘登樓眺遠郊肆
目望天衢明月出雲中照我華髮疎還歸掩閤卧夢到園田
居

憶年二三十咲人不能勤誦書歛萬言落筆飛煙雲有朋自
遠來講論窮朝曛一藝恥不知高蹈躡前聞寧知有衰老耳
聾自如熏身世且未保况敢言功勳

老不與懶期身老懶自至懶不與傲期力憊難強事茫茫視
天宇忽忽心如醉勞生諒何庸顧為形所累弱水隔蓬萊安
得生兩翅

秋風肅萬物百蟲競號鳴蟋蟀最可憐切切悲其生屣履步庭

除素月圓且明翫之不可撥渺焉忽西傾回身掩房闥愴怛煩
慮盈太息以終宵展轉難為情

傲福非所希避禍敢不慎富貴實禍樞寡欲自鮮吝疏食可
以飽肥甘乃鋒刃探珠入龍堂生死在一瞬何如坐蓬蓽默默
觀大運

紫燕來我簷營巢養其雛拾蟲撲我衣銜泥污我書雛成復
生子風雨同安居一旦捨我去瞻之起長吁死別不可追生別
那可思悼徃恨節促待來恚時遲

人生百歲間苦樂相牽攀念生復念死何時一開顏登高望
八荒目睽飛鳥還有願不克遂淚下空潺湲

秋氣雖可悲秋色亦可悅寥寥天宇曠皎皎縣象晰鴈來山
葉紅龍卧江潭潔彼美黃金花含英耀窮節佳人不可期明
月圓復缺空庭夕陰盡露草白如雪佇立望四方彌使憂念
結

窮巷屏人跡開門見青山青山似故鄉客子何當還螭蛄日
夜鳴綠樹亦已殷白日駛西征浮雲不可攀安得生羽翼奮
飛出玄間

雨來群山暗雨過群山明山明後鳥喜山暗後鳥驚歲暮陰
風起白日西南傾寒蟬枝上號夏及蝻草間鳴人生非草木能

無感中情

赤霞變玄雲風起烟霧塞颼颼木葉響曠曠原野黑青泥沒
委巷關塞生咫尺水深蛟龍恣山濕鳥獸竄留滯荷戈人艱
難去鄉客翹首望太陽憂思萃朝夕

望舒乘罕車潜輪躍重淵二儀烟霧交九澤風雲連丘陵
黃潦溝澮成通川鶴鶴失其巢窮後鳴可憐蛙黽一何樂喧
呼聒宵眠

西岑掛朝隤東嶺垂日脚唳唳垓鶴鳴矯矯淵輪躍淒風拂
喬樹密雨翳林薄煌煌籬下花粲粲黃金萼含英不自銜守
分甘寂寞頽持獻美人恐貽觀者愕

晷景無還暉霜露淒已繁松栢坐樞翳桃李更何言旦夕悲

風起黃沙蔽平原萬物盡凋落芳華誰獨存我頭化為鶴不願
化為鵝鶴鳴聲聞天鵝鳴烟雨昏空林夜寥寂躑躅傷精魂
西風吹碩果草茅思索緬撼撼卉木零唧唧寒蟲號百川日
夜流泰山何其高沉浮自有定汲汲無乃勞

夕雨得晚霽豁然如醉醒幽花銜餘紅遠峰出孤青獨坐無
與娛蜻蛉吟空庭良辰能幾何逝者忽如傾歎歌欲自慰歌
竟還傷情

微風振簷鐸玲如環珮響登高看秋色俯見明月上木落天
地寬雲散川原廣來者不可期逝者日已往離居豈無懷惻

愴榮遠想

日暮登高臺流目眇雲間雲間有明月窈窕芙蓉顏光輝被
四表萬古一往還惜無騰化術仰之不能攀

江上秋風急天寒鴈南歸客子睠長途中心一何悲顧瞻望
四方有懷當告誰霜露日夜零百卉厭其枝衰謝不待期榮
盛安可追太息復太息愴悵涕沾衣

薄雲歛微雨返照涵空煙黃葵間紅蓼爛苦濯錦鮮老病若
無歡坐為憂所纏自恨非松喬不能還少年援琴寫此曲曲
盡心茫然

少別無慘容老別有苦心筋力已非故憂思諒難任春風吹
郊原雜英滿園林物生無巨細各以類相尋含情曷能忘矧

乃衆病侵勿言愁可量滄溟未為深

翔鷗搏扶搖九萬一奮翅騶駟康莊瞬息千里至谷紂穴
坎窞鴟鵂集蓬蔚偪仄豈不憐飲啄亦何忌夸父空有勇精
衛良無智翼折海未枯身價杖徒棄何如抱區區保已遺世
事

倦鳥莫安巢風林無靜柯路長羽翼短日暮當如何登高望
四方但見山與河寧知天上雨去為滄海波慷慨對長風坐
感玄髮皤弱水不可航曾城岌嵯峨淒涼華表鶴太息成悲

歌

病身如朽木螻蟻群萃之生意已無多雨露空相滋晨興步

庭除足弱幾不持論年未應尔胡為遽如斯大塊播萬形一
軀非我私暫假終必還但有速與遲居易以俟命聖言豈吾
欺

上古人一心生榮死同哀末世自為心骨肉多嫌猜沉沉十
日雨漫漫百畝苔苔深車輪沒平路生蒿萊嗚呼張仲蔚衡
門何由開

踈庸厭人事疲病畏交游得閑頭已愜敢有分外求開門對
鍾山山翠盈我眸日中市聲遠草綠空庭幽登臨觀萬象玄
理足可搜誰能走逐逐自使生悔尤

別離多苦懷三年當百載來者非所知往者今安在浮雲且

夕起白日埋光彩天地亦有形豈能長不改去去東園公紫
芝猶可采

晨興梳短髮庭樹生秋風萬物有容色與故各不同碩實屬
老成天柔怨童蒙英英黃金花旒旒清露叢歲暮等淪落
何異蒿與蓬

庭前草華發夜涼螢火流有懷不能寐起望女與牛那無一
葦航繁念空悠悠淚如宵露零散漫不可收

四月陽用事群物咸長榮靡草雖就死王瓜亦復生死生誰
所致時至莫能爭達人洞神理守分絕外營脩身俟天命萬

古今其名

忡忡坐虛室曖曖日向暮空烟歛曾岑暝色半高樹緬邈起
遐思逍遙散輕步婣娟天上月的爍草間露物情豈異昔人
事殊非故芳歲不可淹衰年况多慮諒無彭鏗術頽齡那能
駐

夭夭芙蓉花向晚猶媚嫵娟娟明月輝粲粲當庭戶寒衾耿
長夜夢寐空自語勞生邁六極老病在羈旅將思訴穹玄恨
無搏風羽

大火沒西南晝短宵已長志士鬱慷慨老年怨淒涼蕭蕭草
虫鳴蕭蕭蒼隼揚物情各有定人意苦不常跼步陟崇丘流
目睇康莊寧為款段駑勿作騏驥良款段駕鼓車道里有限

量驥驥被重甲力盡百戰場死骨賣千金雖貴亦何償

人生如浮雲聚散無定期驚風一飄蕩各自東西之粲粲陵
茗花淒淒寒露時浮雲不可駐顧盼空齋容

青青瀟湘竹猗猗被寒水遊子如飛蓬佳人曠千里登高左
右望但見黃塵起鳳凰翔不下梧桐化為枳傷懷不可道憂
念何時已

吾觀穹壤間萬變皆有窮何如順天道原始以知終清晨攬
衣起絺綌生秋風雖雖鳴鴈來灼灼酸棗紅悵焉念所思悲
感集予衰佳期在何許瑤草成枯蓬佇立望日月勞心極憊

憊

少年不信老恠聞老人言忽忽老到眼却憶少年愆逝川莫
回流烏兔日夜奔憂思集方寸鬱氣如雲屯試為少年道聽
之亦茫然顧謂少年子聆我爾汝篇爾未及我老我曾猶爾
妍勸爾無我厭勿令人爾憐

今日復明日明日能幾何壯心蕭索盡思念恒苦多引領望
故鄉川路猶且長巢燕已北飛賓鴻亦南翔我獨無羽翼
慨中自傷

烏鳴朝啞啞鵲鳴暮啾啾聞鵲既不喜聞烏復何憂世人務
苟得君子絕外求滄浪迅風波無風卽安流胡為自永炭以
貽達者羞

嚴風萃群有蠅蚊亦無多所憎雖去眼若此歲晏何中夜攬
衣裳起視星與河出雲未還山落葉早辭柯沉思不成寐大
息繼以歌

寒燈耿幽幕蟲鳴清夜闌起行望清天明月在雲端美人隔
千里山河杳漫漫玄雲翳崇岡白露凋芳蘭願以綠綺琴寫
作行路難憂來無和聲絃絕空長歎

秋山青如烟秋月白如水登高俯空曠咫尺見千里悠悠孤
雲行嫋嫋涼風起涼風吹客衣客心隨風飛願作滄海潮朝
來莫還歸

泊舟嚴子瀨遙望仙華山中有騎羊人皓齒頰玉顏餐霞飲

沉瀟坐石濯潺湲長嘯起天風落日為之還悠悠隔雲雨杳杳不可扳

日落天氣涼逍遙步庭墀蟋蟀已在宇鴻鴈來何遲少壯輕遠遊衰老傷別離念我親與友各在天一涯音容兩契闊悲歡絕相知鍛羽懷舊林葺鱗思故池百年能幾何逝者无還期俛仰增感歎有懷當語誰殷勤託宵夢聊用慰所思

久旱草不生一雨青滿地新萸與舊枿好醜各自媚嗒嗒黃鶯吟習習玄鳥至閑庭人跡稀白日澹清氣平生孟公綽庶足無妄覲但願長若斯撥置身外事

江城夜來雨雷音亦何砰今晨視郊原草木皆發榮雙雙布

穀兒來我墻上鳴
園蔬猶可藝無忘
及時耕倦翮得安巢
感荷天地生

浮雲西北起飛雨
東南去微微若輕烟
靄靄如薄霧卧疾少
出門不知春已暮
芳年復幾何冉冉征
鳥度花落有再開水
流無回注坐念入杳
冥明月在高樹

秋高潦水涸旻天亦
凄清枯籜響悲音
羈蟲振餘聲墮墮落
日暉慘慘游子情
風林無定枝馳車鮮
安旌自愧匪賢達默
默嗟其生

山鬼處幽壑自分不
見天寧知無私照及
此暗井泉倦鳥思
故林窮魚思故淵感
荷實難忘庶其保終
年

鍛羽畏高風疲馬厭長道玄陰促暮節何物能不老自非松
栢質敢異出衆草登山臨流水及此晴日好春芳藹蘭蕙秋
實粟秔稻黃精肥可食石泉清可澡榮名何足言息心以為
寶

感春六首

種桃望食實種柳期成陰春風應時至雜英滿園林黃鳥多
嘉聲鳴鳩亦好音勿言荏苒質不如松與楫託根信求固豈
乏歲寒心

孤坐不自適興言出行游凱風吹衣袂白日光悠悠來牟秀
彌野荷芰葉已抽行游豈不好顧盼無與儔回身掩門坐隱

几聞鳴鳩

日暮東風起滄江水微波水深不可涉路遠將奈何靡蕪葉
已齊故鄉隔山河盛年難再得芳意其蹉跎

朝采山上蕨暮采澗底薇雖無梁肉味聊可以御飢羔羊薦
美酒飽食同豢犧玄廬苟未閉彼此誰是非

春風既和柔春日更皎紫天桃紅如錦繁李白勝雪黃蜂與
紫蝶亦各競時節人生有憂樂譬彼天上月願言良其背無
使心自藝

人生多憂患死去百患消但恨不得無由脫鞵鑣浮榮衆
所貴何異掠草焱一生與一死一夕復一朝周器忌盈滿老

子戒矜驕園林無恒芳江海有回潮委心從大化庶幾永逍遙

遠遊篇

三山六鼇背翠水扶桑東雞鳴上海日海面玻璃紅仙人騎鸞鳳
呼我游雲中雲中有金闕謂是天帝宮明星列兩藩琪樹光
玲瓏太一坐端門白髮映青瞳授我玉篆文赤蛇蟠九虹出
入元化先壽命齊老童因逢青鳥使遂造東王公素女如蓮
華歌喉絃管同顧盼動環佩振迅若輕鴻化為五色光倏然
隨長風

秋夜聽冷協律彈琴分韻得夜字

秋清衆籟寂華月耿遙夜玉琴奏瑤席逸響發高榭微風
入林稍稍泉出罅關關黃鳥春嘒嘒玄蟬夏幽憂北鄴語赫怒
西楚咤初疑廣寒府和鑿起仙駕忽驚龍騰霄雷電劈太華
淒涼漢宮女萬里異國嫁逍遙商山老芝歌意閑暇斯須變
暄涼要妙奪造化終焉返淳朴瑚璉在縑藉鄭衛失其淫儀
秦失其詐虎狼失其攫烏鳶失其嚇大音信希聲餘美其如
蔗持此滌塵心末與箏笛謝

雜詩七首

趙女工妙舞秦娥善清聲同入楚王宮各擅傾城名宵陪綺
席宴夙侍金輿行常恐他人至得寵分恩榮涕泣奉顏色怡

態隨風生願為松柏枝莫作日夕英開花不結實坐傷秋露
零

白露出草根顆顆如明珠黃華炫金錢亦復盈堦除閑居無
尤物翫之聊可娛衡門不必扃此非衆所須但恐成蕙苾千
載令人吁

眼力徇穡事矻矻望有秋凌晨荷鋤出日入且未休中夜看
星辰旱潦切所憂西成告豐歲珠璣滿田疇飽食幸可期喜
色欲盈眸寧知霜雪早零落不得收荒畦委滯穗穉籬掛空
篝斜陽照白髮短褐還飯牛天命固如此汲汲復何求

季世罕上壽百歲為長年軒皇不可見顏冉復誰憐安期乘

彩虹羨門駕紫烟朝游蓬萊島夕宿曾城巔常恐聲風枝摧
折滄海田徒令驪山客想望稱神仙

月明棲鳥動月暗棲鳥定茅鴟潛枳枸大眼掛宵鏡皇天生
萬物一物界一性遂令蓋壤間擾擾事爭競喧呶窮日夕豈
不愚天聽化工雖云巧為法祇自病沉思今人嗟欲問誰與
應

蒼蒼山上松濯濯庭前柳亭亭拂雲起矯矯含風久佳人皎
如玉曠世難為偶長歌繼以歎去鳥盡回首昔為瑤草華今
為蠹餘杵棄置勿復道華容不如醜

速成非良器驟得難久好桃李望春舒亦復迎秋稿薜英耀

朝日未夕委蔓草飢農種植禾自慶得食早歲暮寒栗冽衡
門淨如掃瀛洲對方壺弱水為池沼不有千年花安得如瓜
棗徐市駕樓船輕帆迅如鳥仙人倘可見常恐三光老寄書
附文鱣碧雲空縹緲

旅夜四首

月光天上來入戶清如水游子忽思家披衣中夜起徙倚步
回廊烏啼夜未央歆飛無羽翼零淚濕衣裳

昨夜起觀星月在楊枝上今宵不見月星影空搖漾羽蟲飛
拂戶燈吐孤火壯佇立掩衡門愁來獨惆悵

客愁常突兀今夜燈花生雖知無喜報愁亦暫時平解襟成

獨寢留燈待天明喜固不可求客心恒畏愁

六街馬憧憧鍾響聲暫歇兩星光灼爍中有如眉月既見月如眉還看月如鏡月光自有恒人心長不定

遣興

春至日色好白水生青烟江梅已堪折園柳亦可憐鳥鳴山
芳菲魚躍波漪漣人生覆載間與物共推遷守分絕外求何
者為憂煎但願有酒飲無事驚晝眠即此是至樂安用松喬
年

送葉景龍之通州同知任分韻得勳字

泛泛水上漚飄飄空中雲俱為無根蒂搖漾隨網緼北風厲

玄冥霜雪下紛紛送子陟長道
鴈聲不可聞
盛年復幾何
逝川去
汙汙朔方沙漠地
雜沓駝馬群
居庸接太行
華豹所由分
陰山茹毛國
未嘗識耕耘
自古所攘斥
比之鹿與麀
汙京失其馭
冠裳倒玄纁
否極泰則來
天生

聖明君揚旗指大荒
旄頭落胡氛
玉帳萬貔虎
爪牙天將軍
子行勿歎勞
襲芳衣必薰

君恩重山岳矧敢負以蚊
丈夫有壯志
曷問武與文
不見傅介子
盛烈光典墳
奉子一盃酒
別離安足云
時哉諒有會
勉旃樹功勳

送張孟兼之山西按察司僉事任

平明集冠蓋祖帳清江濱天縣赫曦日山湧崔嵬雲大舶發
中流碧水龍鱗紋宿雨霽初伏川原無垢氛脩楊翁深綠禾
黍氣如饋蘆荻響微風鶴鶴鳴相聞市酒雖云薄情至心自
醺贈詩雖不多芳意同蘭薰丈夫樹遠業兒女徒紛紛農夫
務去草稊稗職所耘蒼鷹司鷙擊梟鸞慎其分利劍斷犀兕
不數雀與鼯籌邊有廟筭樽俎茂竒勲巍巍太行山蒼翠浮
網緼萬古戒華戎峻極通天文老罷當道卧氣讐狼虎群引
領望征旆迢迢隔河汾營平曜前烈定遠揚後芬制勝在兩
楹豈必疲三軍功成早歸來華衮昭玄纁

送胡生之定遠教諭任

爲陶中立參政作

青陽獻嘉歲萬物生華姿柔桑莢綠英新柳楊黃蕤祖帳送
行人大舶艤江湄管絃發清音甘醴溢瓊卮歡情旣已暢繼
縑申以詩丈夫生世間出身事明時有材必有用譬彼桐
與椅榲之朱絲絃彈以格神祇一奏獸率舞再奏鳳來儀校
官職敷教位小任匪卑棟梁自勾芒翬霄起陂池仕學猶兩
翅對舉不可遺努力慎保愛勲名以為期

送駱起原之新城知縣任

憶在越王城與子共翱翔子實才俊士舉止安且詳温如春
雪消送照照璆琳琅一别二十年塵沙翳玄黃凄風拉梧桐霜
露摧篔簹浮雲變白黑各在天一方邂逅忽相逢悲喜交肺

腸故情豈不懷 王事不敢違 倏歛復為別 安得不慨慷
西江富文彥 其俗淳以良 念我別來久 愴恨增感傷
英英江梅花 皎皎晞晴陽 折以贈子行 侑之以短章
萱草亦已生 鶴髮在高堂 征鴻漸于遠 擢翮陵八荒
行將儀大廷 鵷鳳參頡頏 陟遐必自邇 永矢莫相忘

連江陳子晟師古齊詩

二首

祥麟陪魯數 王道遂湮淪 秦坑扇灰燧 六籍失其真
茫茫等壤間 談舌紛輪囷 鴟鴞指為鸞 杞梓斯為薪
所以尚志士 慷慨思古人 造行擬淵騫 吐辭追孟荀
不羨季氏富 而甘原憲貧 不榮桃李容 而效西施顰
臨川翫清瀾 味道劇淳珍 誰云

泰岱高布武期必臻誰謂江漢永利涉由通津有為亦若是
是此語非徒申衛武陳抑戒睿聖垂芳名呂公著冊書君臣
同顯榮伯玉願寡過使者知其情柳惠志直道身匱德乃盈
古人如良金百煉彌剛貞悠悠萬載下日月同昭明聖人有
遺訓可畏在後生服膺慎勿替竊比於老彭

西風振枯柯涼月澹光景門前馬蹄歇室虛心獨靜焚香對
六籍耆味知雋永懷人若在眼酌潦何必洞尼父訓九思子
輿明三省康莊無他岐車馬日馳騁捷徑善摧輪此意當默
領

題李太白觀瀑圖

憶昔李謫仙泛舟彭湖東遂登廬山頂直上香爐峯遙望瀑
布水自天垂白虹大聲回九地浮光散虛空萬木震辟易千
崖殷鍾鏞清涼入肌骨如歸廣寒宮賦詩留人間至今響泯泯
丹青極摹寫歆代玄造功逸駕不可追舉頭睇飛鴻倚歌無
人和引袖乘長風

劉宗文萊窩遣興

歲暮寒氣冽今晨頗和緩登高眺原陸陡覺生意滿日色照
地黃墻影看漸短草抽識土膏魚出知泉暖吾生亦天物安
得不樂行且復擷其蔬獨酌慰衰晚

新春

昨夜東風來吹我庭前柳柳芽黃未全草根青已有鶉鳩屋
上鳴勸我嘗春酒我髮日已白我顏日已醜開樽聊怡情誰
能計身後

送醫戴原禮歸金華

峒峒金華山上屬匏瓜星紆餘帶江海窈窕儲仙靈陰谷泉
夏冽陽崖草冬榮帝女降清夜龍鸞夾雲輶旭晷五色光天
葩播芳馨初平剽元氣騎羊遊王京宗公秉節鉞稜威愴邊
庭呂子傳聖學出辭樊六經陳生挾英才雄辯摧五兵至今
文彥士綿綿若連城子兮抱竒術為人駐危齡運鍼號二豎
煮齊泣三彭歲晚趣歸裝日照千山明澗阿多石芝玉色味

如錫可以實肌腸化骨為瑤瓊或可分餉否相從翔紫清

怨詩

屈原沉汨羅不忍棄其宗萇弘志存周寧為一已容申生顧
父愛殺身以為恭子車守明信殉死安所從之人豈不賢揆
道猶過中卞和獨奚為抱玉售瞽聾則足實自取怨泣情
何鍾文狸處幽林無人識其蹤誰令貪雞鷲以觸弋與罟
縻身獻厥皮為人作妍容娟娟芳蘭花託根千仞峰下有孤
飛泉上有灌木叢歲晏不改色霜清香更濃韜光遠人禍委
命安天窮道得復何怨老子其猶龍

秋懷八首

東風吹晨霞初日垂白足濕烟屯簷棟飛雨鳴樸楸厭厭葉
就黃萋萋草還綠索居謝喧囂庭絕車馬躅念來多所懷追
往不可復嬾隨老共至病與年相促省躬慚寡尤守分無望
福駑駘立阜櫪敢慕騏驥逐

秋熱喜稍退秋雨又成霖涓涓屋溜瀉汨汨街泥深清寒中
筋骨濕氣薄衣襟晤言靡與同孤坐難為心俯視青苔積仰
睇玄雲陰弱質昧聞道乃為憂所侵冥冥至終夕悄悄成孤

吟

空階走穴蟻荒埵唳巢鶴陰氛方騰達密雨已彌漫沉沉翳
光景昧昧感昏旦林鴉濕休飛簷雀饑相喚畦步隔關河四

望空慨歎悽悽衣裳單戚戚歲年晏微生如石火徒勞暫時
煥永寤爛柯人萬事一夢幻

清晨啓扉坐微風動游龍離離墻上花切切砌下蛩嚶嚶自
成音灼灼各有容四序迭推移衰病情所鍾身羸足已弱有
願不得從愧負天地生愴恨填心骨

蟋蟀已在宇鴻鴈方來賓天秋風露寒陰谷何時春欲為商
聲歌恐驚梁上塵衡門掩仲蔚庶用存吾真

飽食無一事一日復一夕倚門望圓穹白雲在空碧來鴻與
去燕歲晚各有適英英黃金花粲粲好顏色采擷貴及時霜
露已盈積掩門還獨坐浩然懷往昔惟有故鄉夢可以慰岑

寐

雨息殘暑退涼氣何淒而羈人倦遙夜明月光在帷展轉不
成寐披衣步前墀春芳不再穠夕露空華滋泯默對青燈悵
焉心自思

薄雲散高風天色青如染盈庭露輝輝當窓星燄燄寒來愛
蘭缸著往却筠簟憂思浩無際起坐數更點晦明相代謝避
盈乃無歎未嘗陵孟門誰識行路險賈害豈無因戒之在懷
琰冥豫何可長用之以自檢

太師誠意伯劉文成公集卷之十三終